

香書屋詩笈

丹徒郭琦

籤



Handwritten note:
Hyming
Tiankin
4/19/85

10030

菜香書屋

詩草



菜香書屋余幼學時數遊之地而退庵兄弟所居也蔬圃一區分其半爲書舍退庵與弟白庵促膝聯吟于其中
有客必留樽酒論文殆無虛日余忝世好故常往焉爾時退庵詩已爲鄉先輩所推重余方習爲制藝未能與之酬唱然心竊好之余弱冠游京師與退庵不相見者十年因其計偕至都始有贈答之作比年余官兩淮延退庵於題襟館數共晨夕遊讌不少所作遂多退庵古近體皆工而五言尤深得唐人三昧余嘗笑謂白庵有兄若此不第西樵之視漁洋也然退庵老矣余亦鬢鬢斑白閱歷旣多情懷作惡非復菜香書屋少年時是不可慨也哉退庵嘗主講通州其門弟子請刻其集余因爲之序世愚弟曾燠

春綠未枯秋紅正絢風露相洽雲月時來蓋客居之勝
概也余與退庵同年花南接席桐下披帷擊簫鉢以分
韻擘薛箋而酬句或軒肩於酒半或粲齒於茶餘神契
既深心賞非一會君哀集付鐫微辭爲引輒窺測一二
還以質證焉君深情煙舉曠抱霞張意在則冰融雪映
機赴則泉沸雨傾方干織字早得於龍梭沈約諧聲豈
煩於牛鐸列代體製衆家標韻允能探其積石自得濠
梁者矣爾乃攬秀銅陵搜奇石室觴牒初佩解舞銀毫
巾衫未青私裁繡段瑤章日積香譽四騰與厥弟白庵

齊名盱江二陸皆躍雲之龍而平原先步兩到若凌寒
之竹則茂灌早拔是時前徽已謝後俊未登雲旗靡然
雷鼓弗震乃遂塤篪互唱花萼成編斯爲難哉旣而游
展遠蹈朋簪廣羅弔古招鄴下之英高會集山陰之彥
燕臺梁苑遍陟吟壇楚樹吳雲都成墨采會心不遠則
魚鳥親人放眼無窮則江山助勢譬之臯蘭屢塵戈鋒
愈淬波斯久市寶匣彌充何其盛也然而衣空貼月帽
未簪花羅橫以不第減名馬周以無官作客渴驥寒猿
之悲壯曉烏宵鴈之淒清固往往而有焉今者元髮俱

變青鞋將歸成式苦連徒傳於黎棗王筠真賞莫望於
風塵抱荆璧而傷心投隋珠而怒盼嗟乎嗟乎豈獨退
庵然乎年愚弟樂鈞拜譔於邗上題襟館

菜香書屋訂章序

二

余自丙辰與退菴定交都中十年中間一聚於豫章
再聚於瑞金茲復聚於維揚每聚則必以詩相賞也亦
兩相劇先是退菴與其弟白菴俱早以詩名於時時或
互有畸重長陽彭秋潭以謂白菴逸才奔放而退菴天
機清妙二難蓋各極勝詣焉而未易軒輊也余亦謂白
菴爲人豪宕而退菴樂易趣若微不同然其肫篤於骨
肉孚直於友朋介然不苟取舍有古狂狷風則無不同
故其爲詩亦稱是然皆以垂白不遇未究發所用而退
菴之坎坷爲尤甚故素質游商之聲亦時時間作幽而
善感悱婉而不傷讀者繹其寄知其志焉邇年自海嶠
歸則氣尤鬱勃格尤卓出入杜蘇間儻所謂益窮而愈
工者歟雖然余亦窮於昔時矣而詩彌不工序退菴詩
爲愧憾者久之嘉慶十年五月永豐愚弟張瓊英拜謨

余年九歲從兄學吟咏兄時年十五所作已百餘首錄成一冊卽又截竹紙爲余裝一小帙題日照南詩草復爲余作詩序一篇彙中詩僅六七首而已兄每爲余言古人作詩必有家數因同往市上購買全唐詩宋詩鈔宋詩紀事元遺山中州集及顧立君所選元詩三集以及諸大家名家有專集者朝夕披覽取舊所作則焚之卽又補舊題成一帙過數日又焚去又補作是時吾鄉無談詩者兄弟自賞晰而已陶適齋先生歸田後乃執弟子禮相從就正而吾南城令郭根菴先生卽墨名士

菜香書屋詩草叙

一

也復往師之兩公嘆賞不置遂益肆力焉兄之詩思精而情婉當時送根菴先生歸卽墨五言一首見者皆擱筆二十八歲遊中州詩忽墮頽以同事者才皆庸鈍遂縱筆爲之其後閉戶家居詩又進至遊金陵燕臺流寓揚州與諸名流唱和則詩境益高矣余少無進取志兄輒欲博高第以慰泉下而偃蹇抑塞五上公車裘敝而歸抑何遇合之艱也今刪其舊彙爲若干卷而述吾兄弟小時砥礪之志世之工於詩者其亦不能廢棄也已嘉慶七年孟春正月弟照叙於大庾學舍

自叙

予幼受聲詩粗解吟咏雖性之所嗜而懶於雕刻往往作輟無常比長與士大夫遊往來贈答山川道里風雨舟車閱歷既久篇什寢多牽於應酬者稿皆不存存者又殘缺失次茲自壬辰迄辛酉三十年中十去七八類而編之非敢以問世也遇合多艱憂幽莫遣藉以自考生平踪跡云爾得詩凡若干卷計古今各體共若干首嘉慶七年三月退庵居士識

菜香書屋詩草卷一

南城吳煊退庵氏著

擬古

鬱鬱礧底松盤根拔地起日月磨青蒼千年色不死其
下生茯苓旁有芝光紫春時未有花古心澹如此
桃李爭春風灼灼弄華姿華姿易銷歇春風無盡期芳
時不自惜薄命當怨誰毋爲攬蜂蝶紛紛非心知
誰言蝸角微蠻觸托爲命豈然互鬪爭得失幾時定氣
化所不齊稟之亦成性相閱積古今何如以靜勝

菜香書屋詩草卷一

一

流水無機心遇坎輒知止紆迴任自然瀉亦常千里涓
滴在深山前途不自擬安得澹蕩人與之觀化始

春日齋中讀書

幽居罕人事園林風日晴萬彙益春氣草木欣向榮禽
鳥亦應候相和時一鳴中心浩有得屏跡絕塵營耳目
所不雜几席有餘清浩歌古之人夢寐歡平生

送根庵郭夫子歸卽墨

夫子今行矣河干新水生宦途雙鬢老歸路一帆輕江
樹烟中沒鄉上海上明迴看官道柳攀折不勝情

登益藩故城晚眺

蕭颯西風木葉哀，登臨獨上益王臺。
雲收野外諸峰出，秋迴天邊一雁來。
廢苑淒淒衰草合，寒江隱隱夕陽開。
分明歌舞當時地，瓦礫荒涼冷翠苔。

悼亡

爲張孺人作

漢上天教繫赤絲，珊瑚佩解廿年遲。
阿婆膝下無嬌女，繞近身旁百事宜。
惠連終日影形隨，燈火深宵共下帷。
庭畔紫荊花爛熳，惟君識得是連枝。

菜香書屋詩草卷一

二

蛛網文窗賸藥爐，五更風雨夢回初。
青衫淚染吾何悔，孤負青燈伴著書。

五日

曉起步虛堂，相思還入房。
眼前渾不見，淚下忽沾裳。
人與年俱逝，愁將日共長。
邨堪淒絕處，今日是端陽。

中秋

欲回殘夢遠於天，又到中秋倍黯然。
一樣去年今夜月，愛他清徹妬他圓。

送舍弟照南之南昌

少小爲兄弟與君那暫分西風吹落葉千里此離羣秋
淨江頭水寒生馬首雲臨岐頻執手涕淚灑紛紛

得丁天池書

叩門遠得故人書猶說維摩丈室居拂檻松濤吹院冷
捲簾山色到樓虛別來離緒絲相似近日詩情畫不如
憔悴如吾君莫問半年貧病守蓬廬

登滕王閣

超然高閣豁雙眸萬里長天盡入樓遠浦雁聲飛肅肅
夕陽波影去悠悠珠簾畫棟人何在地迴天高我欲愁
安得盛筵開勝會看誰年少占風流

菜香書屋壽草卷一

三

送鄧石潭先生之廣州

離亭楊柳色搖金催送征人出故林馬上鶯花三月暮
舟中煙雨一春吟馳驅異地論交日迢遞天涯弔古心
樹幟南園論將帥驍騰猶是老韓擒

渡黃河

浩浩黃河水奔流萬里餘南來疆冀豫東下走淮徐浪
湧山相似帆張馬不如我行殊未已日暮復荒墟
雨後登遐思樓晚眺

彰德通判署

花圍錦砌樹圍屏四面煙光透畫櫺下上烏吟空院翠
參差山送一樓青人憑曲檻初收雨天散微雲乍見星
登眺儘容吾輩醉晚鐘衙鼓未須聽

覃懷道上

霜風颯颯暮雲收萬里關河感浪遊天外雁聲秦塞冷
馬前山色太行秋來從紅樹穿村舍遙向青帘認酒樓
路入覃懷問遺跡斜陽衰草弔潮州

修武有韓文公墓

登四照樓

懷慶府署

倦作天涯客關山滿目秋懷人頻見月借酒一登樓雲

氣西南迴河聲日夜流故鄉歸雁外眼色使人愁

楊子江舟中

銀濤雪浪渺茫間何處看雲是故關日落煙浮瓜步樹
江空天遠秣陵山過殘穀雨花將盡改遍春衣客未還
短鬢蕭蕭慙對鏡那無樽酒一開顏

將之粵東留別諸同學

征車才得返關河不奈驪駒又唱歌幾輩交朋榮落異
廿年兄弟別離多輕裝剩有書還在舊屐行看齒漸磨
此去萍蓬君莫嘆羗子已是慣奔波

東指羊城路幾千啼猿不斷暮江邊行經瘴雨蠻烟地
到及江梅臘雪天夢裡定知尋遠道意中未敢數歸年
明朝分手離亭冷相對魂消各黯然

送照南遊吳越并別尙木

居苦無長策行乖骨肉恩與君爲兄弟少小同一身飢
來相煎逼一朝雁影分我行尙未發君車已在門執手
一相送欲泣聲反吞人生有別離念誰奉晨昏

昔我從北遊浩浩夷門路豈不惜長途奔馳吾已素西
風木葉下忽復橫江渡山深虎豹驕雲黑蛟龍怒念子

初遠遊使我心中怖此別已凄然況乃歲云暮

嗟我舊日歡飄然亦行役結束舊書卷去作江湖客同
是抑塞人爾我傷落魄黃鵠一失勢不能奮六翮踐踐
走風塵各自無顏色去去勿復陳歡娛永今夕明日立
岐途寒江烟霧積

廣州登鎮海樓

平生夢落五湖遊興到超然此上樓烏外有天皆水國
烟中何地是瀛洲罡風浩蕩搖蓬鬢春色微茫赴客愁
指點鄉關重回首白雲無盡北山頭

春草和韻

東風昨夜太多情野燒枯痕斷復生鋪逕似茵還似繡
入簾宜雨亦宜晴惠連池畔遙通夢蔣詡門前未識名
最是清明寒食後碧天無際暮煙平

有憶舍弟湖南

芳草萋萋漲綠烟洞庭三月水連天滿船明月春衫薄
記否雙鬟撥四弦

與照南夜話

鑄金說劍兩無成坐對清宵話短檠一徑蒼涼沉月色

菜香書屋詩草卷一

六

百蟲淒切作秋聲吹竽濫己同南郭賣賦窮還類馬卿
挫盡雄心羞起舞不堪耳畔聽雞鳴

疊前韻酬照南

十載吟詩癖性成薄遊久廢竹窻檠那知落葉秋風候
又聽空齋夜雨聲長哭有誰憐阮籍著書真欲效虞卿
南窻半榻容高枕一任閒堦蟋蟀鳴

題梅惕菴先生看奕圖

畫閣棋枰鎮日開白頭名士自追陪盤中不用翻新局

殘着曾經試手來

圖寫陶適齋梅怡園兩先生對奕二公俱爲明府歸田

黑白雌雄興未闌何如袖手作閒觀世間勝算誰先定
布局時難了局難

妾命薄

東風吹花花不發杜鵑夜夜啼紅血生女莫作蕩子妻
可憐薄命老深閨存歿他鄉兩難保郎縱歸兮郎亦老
停針久不繡鴛鴦頭白從無新嫁娘

雜詩

山中一夜雨似聽空齋時獨坐意蕭瑟有弟天之涯遠
行異鄉縣十年九別離湖南瘴癘地虎豹猿夜啼以我
想猶怖居者能無悲歸飛亦有雁所處各路岐長夜不
能寐角角鳴荒雞

新月不到地流螢飛近樓蟲聲出四壁夜氣清如秋感
此念曩昔不見舊良儔吾黨二三子骨貌清且修少小
好詩書個儻居上頭浮雲忽西東影隨江水流遠道莫
云來相思空復愁

古有長生藥而無不死人亦有不死人幻化非其真人
處天地間元氣精與神三者但損一形衰志亦昏統攝
在養心情欲死之根所以醉夢中生機理不存我願常

清醒可與達者論

暮色

暮色平連翠靄間
疎林一帶鳥飛還
炊煙不斷和雲起
遮却溪南幾尺山

接家書并得舍弟湖南消息

衡陽千里雁書回
徹尾從頭細讀來
渾欲忘情滅懷袖
匆匆疊罷又重開

遣懷

寂寞空山嘆索居
微吟抱膝轉愁予
情堪自遣惟耽酒
習未能除且讀書
烟寺鐘敲鴉散後
苔堦蟲亂月初初
疎疎短髮蕭蕭影
添個蒲團畫不如

發章門冒雨行舟

言歸舊山館
催上木蘭舟
水驛千帆雨
湖天一雁秋
濤聲沿岸落
雲影漾波流
行矣將垂釣
孤篷合載謳

舟行雜咏

曲港新添野水昏
不多江路兩三村
蘆花洲白鷺鷥下
田舍人家秋到門

題齋中壁

勞生得休暇重復叩仙靈洞口春常在雲深戶不局草
從新雨長山向故人青藉可尋圖史輪蹄此暫停

照南三十初度陶敬亭倩畫手作草廬抱膝圖以

贈照南有書索予作詩因賦長句

憶昔與子皆童卯

東坡句

拔劍高歌雄顧盼生來頭角何

嶄然口如懸河目如電自謂功名指顧間那識流光疾
如箭我生三十六年矣東西南北風塵賤紅顏相顧已
鬚眉壯不如人可三歎如君勇邁氣倔強胸中星宿光
燦燦胡爲抱膝舊草廬布襪青鞋寄蕭散沉思室內今

菜香書屋壽草卷一

九

古空浩歌世上榮枯換衡門泌水古何人我見猶遲君
自遠彭澤子孫真解人爲倩畫手開生面貌爾形容寫
爾心紙上丰神奕奕見虛堂聽雨半平生別離回首心
悲戀尺書寄我索題詩詩成恨不共談論荷花十里清
風涼知已攜觴恣歡宴茆廬著書自千古子亦浩然有
本願

雨中

幽居慵不出十日雨傾盆屋古添新漏苔深過舊痕江
聲喧到枕雲影靜依門聞道魚鰕賤隨時佐酒尊

涼夜不寐

水閣三更夜色清，娟娟風露晚涼輕。不知秋氣來多少，滿耳蕭騷是此聲。

題照南遊元墓詩後

黑夜看山興太奇，山雲風墮月斜時。模糊認取飛空處，疑雨疑煙寫入詩。

照南復有蘇州之行相送於石頭城畔作贈行詩送君從此去，前日來時路。記得望君來，三朝又三暮。楞伽寺外山，新郭村邊柳。畫作石湖農耕桑常在口。

江水流朝暮，江中多鯉魚。南來得鄉信，莫忘寄封書。

秣陵送照南歸家

兩作姑蘇客，來往秣陵城。秋風聽不得，昨夜起離聲。握手送君歸，心已先君去。明發最相思，倚門倚閭處。岐路復岐路，天涯當日暮。記取發寒梅，相遲麾扇渡。

自題畫

生涯一片舊青山，家在重雲疊巘間。貪看秣陵春色好，西風吹過大江灣。

自題課耕圖卷子

山田數畝傍吾廬了罷殘書便荷鋤機事不來心活潑
批風給雨有誰如

奔車跋馬原無味說劍談天也覺癡何似一犁春雨足
儘容睡到日高時

多收幾斛釀春醅漁弟樵兄數引杯縱使十年虛舊願
風光先寫畫中來

照南寫墨竹卷子題咏殆遍漫書數絕句

滿紙繁香筆底生花花葉態縱橫自從染就湘靈色
湖海諸公識姓名

菜香書屋詩草卷一

七

妙筆能邀騷客賞名花合受美人題

金陵閩秀陳止君陳淑蘭俱題有詩

知君畫本翻新樣長板橋邊水閣西

飲醉紅樓酒後作雪溪春漲圖贈校

書素君極爲得意好事者多傳咏焉

剡藤十丈墨波涵紅燭燒殘酒興酣他日竹窗重把玩
冷烟疎雨是江南

送丁拙庄之桂林

零陵漢時郡送子念離羣棹鼓湘江水衣衝桂嶺雲俗
蠻花少艷春暖瘴添熏去此無鴻雁音書不易聞

立夏日渡江

節物初逢夏羈人快遠征潮鋪江水濶風度布帆輕山
接瓜洲樹人來浦口城回看鍾阜色天際翠烟橫

六合聞照南有常州之行因寄

六峰峰影蔚晴嵐回首金陵路百三此去毘陵知更遠
那堪江北望江南

尋升濟庵訪曉義和尚

結伴尋山去乘涼渡水來爲因僧了悟不憚路迂迴翠
竹緣雲上閒花繞砌開一聲清磬晚檐外夕陽催

舟次不寐

客愁眠復起風露濕衣襦野曠星千里長天月一湖蟲
聲低拉雜樹色遠模糊苦憶鄉關路歸程尙半途

自題水閣

卜居新喜傍江隈小閣疎櫺面面開碧水一池花作岬
方園半畝翠圍臺窗虛月影侵詩案簾捲山雲落酒杯
剛是江南遊倦後依稀風景亦佳哉

客瀘溪講院作

仄嶺奇峰路曲斜兩三村裏不多家人來畫閣初歸燕
春老山城更落花永夜篝燈親几硯經旬課雨話桑麻

時早求雨南薰催我匆匆去滿袖攜歸洞口霞

新晴題水閣和韻

一犁溪雨足新水泛鵝黃小閣晴烟霽疎簾燕語長柳
邊來畫舫花外出漁筐幽賞添清趣高吟踞石牀

和韻水閣對月

高閣枕寒流開窗見月浮水平波似鏡夜靜氣如秋螢
火深林冷荷香曲檻幽此心原不繫浩蕩一虛舟

泛舟虎邱

春風一棹木蘭舟選勝招邀到虎邱嫩柳乍新行客眼

菜香書屋詩草卷一

三

好花都上美人頭風飄歌管來烟浦香繞珠簾出畫樓
我亦曾經遊屐遍人生行樂是蘇州

與舍弟渡江

推蓬初見日解纜卽乘風山色江波外人家浦樹中不
知滄海濶頓覺地天空有弟能豪興高謔氣獨雄

遊平山堂

謔吹竹西傳勝迹扁舟路繞古城闔畫樓壓水爭迎月
嬌鳥吟花各媚春烟柳至今思帝子江山自古待詩人
尋遊我怪匆匆甚未許淹留載酒頻

淮安道中

草籬茆舍夾江津，柳色依依漸覺春。
自倚篷窗看暮色，不知身是畫中人。

秦郵道中和韻

落日秦郵道，孤城淮海西。
千家居近郭，一水夾長堤。
野曠知春少，天空覺樹低。
無須問財賦，厥土是塗泥。

法源寺看花和曾農部賓谷韻

不放春光去看花，古寺來東風如見約。
昨夜正吹開，欸欸逢僧話。遲遲任僕催，故人得佳詠。
相賞發新醅。

秦香書屋詩草卷一

十四

上巳日招同友人寓齋小集

四十年來老賤身，春風吹逐九街塵。
天涯尊酒逢知己，晴日鶯花及令辰。
獻賦何人才獨擅，思鄉昨夜夢還新。
商量故是青山好，鶴性猿心未易馴。

歸途阻雨

長空雲暗雨如傾，乍阻歸途半日程。
野水亂流沿路漲，霏烟不斷繞車生。
荒村茆店人初定，短榻孤燈夢未成。
故國京華俱遠道，那堪惆悵兩關情。

清江浦登舟

出門一笑且歸休，趁上江南舫。舟同病劇，應憐棄物，謀生又擬托諸侯。別來隄柳經新雨，幾日長風似早秋。我欲倚橈歌一曲，青山寂寂，水悠悠。

泛舟夜行

薄暮乘潮上，輕橈撥水雲。江空天不夜，日落岫難分。野戍時驚犬，中宵暗聚蚊。不堪孤客況，沾酒得微醺。

再過京口驛作

半年四度往兼還，快意輕身一葉間。雲樹千重開鐵甕，波濤萬疊湧金山。天空烟散東西岬，風急帆爭上下灣。從此南行知較近，夕陽明處是鄉關。

葉書屋詩草卷一

五

秦淮感舊詩

依舊欄干繞碧流，水晶簾影下銀鉤。琵琶弟子都零落，滿地苔深院宇秋。

謂荷花視雲皆周琵琶弟子

丁字簾前花亂飛，波光橋影上簾幃。自從人去青溪冷，謂范小雲幾個笙歌月下歸。

謝家飛絮忒多才，官玉一曲紅牙酒百杯。聞道成陰扳折

少錯教蜂蝶度牆來。

百花叢裏號花王，靜處分明別有香。歌舞臺空人影散，

流將春夢過維揚

趙靜容有文狀元之目近流居揚州

徐孃老矣尚知名

謂陳蓉娘

多病腰支太瘦生我是飄零舊

羅隱不如人處最憐卿

梅花瘦影怯春寒燕子來時春又殘

謂郭秀英院中有武狀元之稱舊有

人贈句云梅花香勒三分瘦燕子來爭十日遲

重過綺窗飛璣處更無秀色耐

人餐

自題山水筆頭

欲買幽棲半角山前臨溪水結柴關小橋一道垂楊外
時有詩人日往還

菜香書屋詩草卷一

七

椎髻山妻藏斗酒蓬頭稚子摘園蔬先生高臥南窗足
讀罷儒書讀道書

檻花砌卉繞前檐明月當窗畫一簾夜半棋聲人未散
爐香茶火不妨添

興酣潑墨寫雲箋風雨關門著異編寄語京華諸舊好
吾將歸計足林泉

靈隱飛來峰

飛來來處着何因峭壁玲瓏現佛身頭石當頭參色相

石岩中有洞微露天光從下仰視空中儼一佛像

冷泉三面滌煩塵峯下卽山

前雲擁千重翠厓畔花開四季春一自醉僧留異迹相傳
洞中卽濟顛禪師修行處有白猿石迹空中指點認來真

西湖

勝遊畢竟說西湖始信天然有畫圖堤柳盡成詩境界
山雲都費繡工夫橋通臺榭無嫌小路入林泉不厭紆
他日結廬歸臥穩好憑雙槳棹菰蘆

巖瀨

垂釣原非釣逃名更得名獨忘天子貴因見故人情
草蒙茸碧游魚自在行富陽千尺水徹底向君清

菜香書屋詩草卷一

七

舟過嚴州

落照萬山紅孤城山色中灘聲喧到市樹影密低蓬生
計漁樵足居人質樸同無須戒行李今日已淳風水次向多

盜竊

題曾農部賓谷西溪漁隱圖

春水接平蕪烟波漾夕艇透迤古蕩間愛此西溪境宛
爾碧玻璃風動散花影此間結精廬懷抱亦可騁有時
把竹竿獨釣溪雲冷非魚却知魚樂意誰能領如何畫
省人早自思恬靜披圖見素心令我俗情屏

哭張雲溪

好友半零落

十年間魯虛崖陶畫堂陶敬亭
丁拙庄余中州俱先後去世

何期哭到

君卅年俱幻境一櫬等孤雲空有才驚世徒教藝出羣

秋風最蕭颯觸目涕紛紛

處世渾無我知交有素心撥愁惟借酒寓意亦彈琴豪

宕猶如昨風流不可尋飄飄丹旆出淒斷夕陽沈

禪心與道骨夙世本靈根易証浮生理難拋罔極恩庸

醫方少案高枕思無言五老峰前鶴應招夜月魂

君素慕廬

山之勝今春讀書山中因染嵐瘴遂得病

菜香書屋詩草卷一

六

病劇聞呼我咿咿語不真聲華應在世書籍與何人夢
憶生前路心酸几上塵思君無處說惟有淚沾巾

慰兒新舉一子口占誌喜

初試啼聲裹錦綉羣誇頭角更崢嶸果教雛鳳翎毛好
始信吾家世德清祭掃又添人一輩田園尙笑我無成
老夫今日無他祝祝汝無災過此生

宜黃山中

萬壑千巖曉霧收疎林殘雪耀雙眸人隨鳥影雲邊下
水散冰紋石上流路滑最妨羸馬足風寒偏冷敝貂裘

平生已是驅馳慣取醉茆簷又少留

山中寒夜

一燈對孤館寂坐意蕭騷月色臨窗靜灘聲入夜高在
山寒較重終歲客猶勞自笑何爲者消磨舊日豪

菜香書屋詩草卷二

南城吳煊退庵氏著

雨夜寄懷舍弟湖北

總是飢軀誤長教見面稀中宵聽夜雨兩地感征衣短

髮身將老躬耕願久違烹雛思屋漏涕淚向茅扉

少小家居

天雨屋漏先母因謂曰常聞四書存在陋巷三字爾兄弟作此題我爲兒烹一伏雛益誤以陋爲漏也

贈衢州教授吳東垣先生

老矣吳夫子科名五十年豪情餘白髮宦况一青氈對

酒時能醉安神不學禪通家聯舊譜未敢慢前賢

菜香書屋詩草卷二

有感於白髮而嘆之

白髮不辭苦偏上勞人頭四十未云老蕭蕭雙鬢秋憂
患一相煎血氣爲不流鏡中非故我坐對紅顏羞養生
道貴寂形攝與神謀彼姝誰家子玉貌清而修居養亦
能移豈必王與侯神仙不可學富貴不可求百年無再
少余生長抱愁

衢州清明看燈

關河隔處別民風燈火清明照夜紅一市管絃聲縹緲
九霄臺閣影玲瓏魚龍隱現爭翻浪仙鬼飛騰半踏空

用十歲以上兒童巧陳百戲足踏
兩木柱離地五六尺行走如飛
好是時和民氣樂繁

華應說浙江東

春日講院示同學諸子

大道不終秘春至物自呈
衆卉欣夕秀白鳥朝和鳴
氣機一鼓盪形色流光晶
開軒做遙翠倚檻來空明
暖風吹微雨時有花落英
萬彙愜幽賞傾懷歡平生

寄懷曾賓谷農部

三月衢州郡春風正放花
離情同昨日回首隔京華
想像宸陛逶迤退晚衙
可能憐舊雨流滯各天涯

菜香書屋詩卷二

春暮雨中

才得春來又暮春
客中無那雨頻頻
遊仙虛負看山興
問字偏勞載酒人
寒氣未除晴較少
閒花將落草長新
半年不作京華夢
觸我愁懷是俗塵

李笏堂道經衢州過訪齋中留宿

風雨故人至開尊蠟炬紅
在家翻濶別岐路一相逢
鬢髮參差老悲歡約略同
勸君留信宿明日又孤篷

遊爛柯山

晉人王質遇仙童奕棋處
道書為青霞第八洞天

風雨兼旬客況清
天教新放一朝晴
半春未踏郊原路

愛殺青疇似掌平

爲訪青霞八洞天風湍一葉剪寒烟仙人莫笑凡夫俗
得到看山便是緣

暫向飛梁立少時天風浩蕩鬢邊吹不知樵客遊仙後
又得山中幾局棋

捫石摩碑認歷朝翩翩童冠指山椒一聲清磬斜陽外
雲滿重岩鶴在霄

寄胡甘亭

駐顏思採藥我欲隱岩窩借問山中客白雲何處多

菜香書屋詩草卷二

三

五日新晴

兼旬積雨戶常扃五日晴光透畫屏蒲酒乍傾愁頓撥
萍交相見眼俱青天空烟散香浮座院敞陰移樹入櫺
不用辟除懸艾虎朝來爽氣倍驅靈

感懷一首

天涯歲月共愁過客緒無聊睡有魔積賤寧嫌知己少
長貧到處負恩多鶯花勝日傷岐路風雨閒門長薜蘿
濁酒未醒豪氣在且容歡笑且高歌

有懷舍弟

浙江流不過岷江兩地音書少客艤我更憶君能憶我
雨聲蕭瑟打西窗

寄內

柴米商量事早炊廿年累爾鬢成絲今來一事差堪樂
添個孫兒日抱持

雜詩十首

心苦不能寂念念生煩惱隨境幻空花安有好懷抱默
處百憂煎行坐徒顛倒紅塵障未離白髮垂垂老仙福
只清閒消受要有道古之達觀人塔焉形若槁無生識
化機胸中長浩浩

菜香書壽草卷二

四

利不若市賈勢不若徒胥穫不若耕種樂不若樵漁吾
徒二三子挾此兔園書篝燈坐深夜訶聲出蓬廬憤欲
磨之去咿唔非良圖沈思忽太息不讀復何如

天地無閒人各使營其生生理一甫就精力爲之傾要
當缺陷處數定理若衡達人貴知止造物亦惡盈我願
齊得喪無患亦無爭何時南山下披蓑叱犢耕

獨容易爲安渠渠得夏屋不種眼前花春來植秋菊豈
不艷時芳愛此伴幽獨野草白露零寒霜凋衆木盛衰

理則常籬下新醅馥

轟雷不作雨慘淡天雲陰長風號四野蕭瑟勞空林良
苗日望澤涓滴卽黃金如何赫赫威而無膚寸霖不傷
暑氣酷歲早愁人心

有客清而修往還數晨夕爐烹山澗泉坐對松陰奕向
我語寂寥磅礴忘形迹自言不羈人半生傷落魄嗚呼
君勿悲我亦懷淒惻車馬聲喧喧風塵路窄窄淡泊得
居閒安往不自適

孤燈耿殘夢所夢皆陳人悲歡不一狀歷歷平生親新

菜香書屋詩卷三

五

知雖云好氣誼自有真回首少年日淹忽成颺塵存者
俱遠道軼軻常苦辛景光翻自惜誰有百年身

堂前松柏樹有鳥巢其顛呼羣恣飲啄飛鳴適所天矰
繳不能施風雨意安然豈必人愛護擇地據萬全身無
鳳凰翼文采殊翩翩有時振翮起回翔薄雲烟低頭顧
小鳥意態自矜憐莫嫌寂寞鄉且與樂廻旋

有客歌清徵主人發商聲同工不同曲音響難和平按
節別高下流韻異濁清知音心尚爾何有世路盟吹壘
我和箎挾瑟子搗箏一心不相背悠悠千載情

賣李必鑽核前言戲之耳適從五都來不謂果有此千金人所難一毛析及髓始疑闌闐兒而乃衣紈綺江湖行路難浩歌思田里

衢州憶舍弟湖北

悠悠漢水隔鄉關西指斜陽暮靄間半世江湖生白髮何年蓑笠買青山思家都有魂追逐岐路曾無札往還幕府憐才歸物望可能脫穎動荆蠻

荷

一池碧水不盈尺種得新荷三五莖不肯將花被人折

疎風曉月最多情

舍弟九日至衢州書院和韻

才聞飛舸返江關那憶聯牀到此間對菊宛然茆舍酒登樓如看故鄉山城高日暮砧聲急雲淨天空雁影還且向清齋留幾夕二三儕輩喜追攀

將赴衢州留別舍弟卽送之官廣文

送老齏鹽甘似蜜東坡作詩戲子由丈夫要當氣不折一官雖冷聊優游廣文合讓有才居鄭老三絕詩畫書昨日論交今稱意畢秋帆制府爲捐就教職絕勝僕吁我馬瘡便可

移家作活計開口大笑傾百觚墨光燭焰映齋壁酒肉
寧復尋屠沽却憶聽雨虛堂裏中間身世真夢耳雪泥
鴻爪遍天涯一年一見情難已我羞白髮已成翁君亦
烏皮甘隱几竟欲聯牀話疇昔那堪別離今復始春花
爛熳春鳥鳴我早囊書戒行李知君念我欲別離執手
交觴雜悲喜爛柯山上白雲陰百花洲畔湖水深相思
直待秋風發桂蕊黃花仔細吟

貴溪舟中遇風

東風三日吹不止舟行十里復五里百尺繩牽蟻旋磨
舵工口呼手亂指水逆灘高泥滑滑膂力難施困如此
回頭却羨下水船葉葉蒲帆白鷗起人生失意那可知
且對山花傾酒卮轟雷掣電泣山鬼忽然樹轉旂倒移
耳邊但聞餓鴟叫我舟如馬騰空馳悠悠行路說通塞
順逆無憑愁不得

自玉山至常山道中

玉山至常山行人常起早爛熳交春花迢遞連芳草居
人不是武陵源客遊如入邯鄲道蛾眉二八倚屏邊雙
鬟倭髻恰垂肩擔者捋鬚况少年使君佳馬來堂前回

眸一笑姿嫣然宮瓷滄茗袖輕舉對面相看嬌不語東
西楊柳送行人千萬儂家喫茶去

春夜風雨大作

東風不肯吹花開怒飛沙石聲如雷矮窗夜半不敢臥
三間破屋愁傾頽鏗鏘檐瓦雨奔瀉燈昏飢鼠嚙牀下
淒然四壁悄無聲蕭蕭孤客何爲者一重簾幙綠窗深
閨人夢醒愁寒衾那知蒼鬢天涯外躑躅空齋更漏沉
雨中迎暉閣望爛柯山簡汪古亭廣文

汪名元望

爛柯山色何佳哉秀處正對軒窗開鸞旂鳳羽紛來下

菜香書齋草卷二

八

仙之人兮雲中回春晝冥冥雨如織樓外一望浮煙埃
有象無象着恍惚渾然元氣相胞胎長風變滅現奇景
空中半露千花堆縱令南宮大放筆妙處正難傾松煤
憶昨攜客山之隈樵歸棋罷空裘裒石梁跨處了無取
但聞猿鶴鳴相哀此間舊亦無此閣斷垣殘礫交蒿萊
世事廢興固有數似爲看山特庀材乃知遍尋邱壑徒
破碎何如登高遠覽能兼該急須美酒置千酌日日登
樓莫放杯汪君見說能豪興風雨來時着屐來

題汪古亭西征望華圖

三峰崒嵒連天都眼前峭起峰峰孤蒼然秋色落衣上
汪君示我西征圖自言浪跡非得已浩歌一劒辭鄉里
十載潼關三戾止太華西迎多色喜蓮花向我開常新
玉女峰頭招手頻騎虎來作白帝臣蒼涼夢醒身在秦
馬前看山馬上想絕巘飛岩瞭如掌胸中奇氣不可象
磅礴更使筆端傲問誰有此好容顏色蒼蒼兮意閒閒
汪君之高高莫攀我今見君思華山

雨夜

急雨顛風徹夜喧夢魂繚繞在鄉園盈盈閣外雙江水

到否當年舊漲痕

菜香書齋詩草卷二

九

再至衢州清明看燈

春宵燈火散煙埃蕭鼓聲沉百戲開
鰲駕海山排浪出
槎浮星漢撥雲回
隋宮花綵風中剪
唐殿霓裳月下來
兩度衢州作寒食也隨賽社倒香醅

獨坐

片雲風四捲飛雨滿前山
小閣無來客
先生正掩關
花繁春易老
心靜晝多閒
獨抱樽中物
相將作笑顏

友人齋中小飲

天涯知已一樽同頓覺浮雲念念空
世事人誇鬪蠻觸物情我久笑雞蟲
荒園經雨苔侵壁小閣鈎簾燕舞風
且作清閒消永日壞牆一角夕陽紅

山齋夜坐

風來樹有聲雨暗螢飛戶淒清怨遙夜
荒城聽寒鼓百憂從中來循環如亂縷
居勞身易安在寂宵彌苦豈不懷慨慷
有力莫子努鄰雞角角鳴寒燈羞起舞

四顧無同好展卷思古人古人莫子覲
古權誰結鄰百年會有待恨已非青春
酌酒洗腸胃僮僕殊可親鐘動生虛白
鴉散知天晨卽當事盥沐整理頭上巾

雨夜

暮雨瀟瀟風打廊夢回酒醒正他鄉
檐聲不斷愁相續寒氣難消夜較長
隔院松濤喧到枕閒階流水響通塘
莫將岑寂繫羈念擁被孤吟亦樂方

午夢

銀漢何曾隔春生白玉堂東風吹雨
暖花氣襲魂香微汗初銷粉新聲欲
繞梁覺來成一笑窗外正斜陽

漫興

憔悴居然一老翁，漫將蹤跡感萍蓬。
葛中漉酒思元亮，絳帳生春愧馬融。
正自嘯歌千載上，何妨風雨萬山中。
羈棲已覺平生慣，到處泥痕認爪鴻。

月夜獨酌題齋中壁留別

月出四山合，高空生野煙。
晚風吹暑散，夜氣清林園。
解衣掛蘿薜，酌酒斗牛前。
深陰熠螢火，高樹聞夜蟬。
冲澹神與曠，煩憂一已捐。
念此寡人事，起居適所便。
顧有章門約，未了塵中緣。
秋風刻期至，別此良悵然。

夜泊舟中偶興

菜香書屋詩草卷二

十一

蕭蕭夜雨打孤篷，千里家山客夢中。
明日片帆人又北，梅花驛路正春風。

舟發閩門却憶舍弟

雙槳咿啞盪夕烟，春風重泛虎邱船。
半塘風急爭來棹，曲岸花開記往年。
酒醒三更歌未歇，潮生十里月初圓。
扣舷遙憶章門客，更隔章門路一千。

時舍弟攝
禾新學篆

絕句

果然人面映桃花，錯認紅樓第幾家。
記取春風吹到處，月明深巷小籬笆。

閒步偶作

垂柳垂楊綠幾層
小橋流水晚煙凝
行從泡子河邊過
春色留人似秣陵

出都留別李笏堂學正

情好如兄弟
天涯復對牀
寫心頻看劍
醉酒共搜囊
風雨憐寒夕
鶯花趁老狂
莫嫌分手疾
子意樂江鄉

途中有憶

同是天涯淪落人
青衫留得淚痕新
迹同柳絮初辭樹
心比渠荷未受塵
離別定然知夢醒
商量斷莫認情真
迢迢歸路連芳草
偏向征人惹恨頻

菜香書屋詩草卷二

七

月夜園林避暑贈詹南有兼呈胡茂圃

明月出高樹
掛我屋簷端
解衣散暮暑
新知諧古歡
新歡復舊好
投契在片言
花光上微露
竹涼生晚煙
茶鼎候湯沸
一甌滌煩煎
蟲聲草根響
旣靜能忘喧
感之發清咏
削稿開南軒

戲題蕉葉扇

不比齊紈巧
製成天邊一葉
借涼輕若教
拂向纖纖手
別有香風撲面生

題陸曉峰杖頭錢圖

玉簫翠袖圍華筵月下酣歌花下眠結交意氣傾年少
何可一日囊無錢錢兮錢兮勝珠玉不求有餘我知足
天工若爲斟酌之杖頭寶字朝朝綠詩成笑傲凌滄洲
萬事悠悠忘寵辱畫中認取陸生狂不是財奴免醫俗

秋禊篇

乾隆歲癸丑孟秋七月之三日主人邗上修禊事約賓
客共連袂出其地九峰園園近江安門水木最明瑟儼
有畫圖如江村客旣列坐不冠襪人皆山水接吳越主

人先得視刻蘭亭序與詩繪寫崇山峻嶺面面奇禊名
以秋秋在此遂臨清流而洗之紫雲一片黑光膩製文
恰寫蘭亭字連峰者嶧獨者蜀主人染翰面如玉水邊
千朶萬朶蓮萼畔一叢兩叢竹人言此會仿永和但得
其意樂已多古來賢者舉動必傳播卽如魏公芍藥承
叔荷會逢其適寧知他禊取菽濯秋亦可秋水淡淡秋
無波吾曹何以爲君歌主人顏開歡曰諾哉宜寫爲圖
畫以傳於將來

九峰園讌集

綠楊南郭問園林天入新秋客共尋花塢陰交春氣在
雨絲斜界水紋深湖山不易逢賢主風雅今來遇賞音
何必蘭亭誇韻事座中秋禊客先吟

徐開齋蘭亭圖硯詩先有爲公補寫

秋夜篇之句

題賓谷康山留客圖

一曲琵琶水不流愛他池館作新秋翻嫌七子生偏早
不見詩狂酒俠遊

山樽新月冷秋衣三百年來客到稀剛是相逢又相憶
江南江北暮雲飛

菜香書屋詩草卷二

丙

投轄留賓舊有名片帆斜日駐江城商量縱做溪山好
難寫當筵惜別情

小秦淮舟泛

欄杆一曲照平川夢繞揚州水上船盡捲珠簾和月醉
荷花香裏小遊仙

題蘭雪秦淮春泛圖

秦淮新水帶春流記泛蜻蜓遶畫樓簾裏桃花簾外柳
不關情處也回頭

紅塵老去鬢蕭然羞向春風喚酒船今日披圖尋舊夢

對君還愧十年前

雁來紅和韻

過江秋色雁聲催都向明霞着色來骨艷能禁清露洗
粧寒好襯紫雲裁二分月下芳心冷萬里霜前笑靨開
今日相看慚白髮倚欄同汝醉深杯

又和韻

吹到江頭萬葉風長空一一見賓鴻人來錦苑繁華候
秋老芳叢淺淡中分外巧多疑綵剪天然色不借花紅
自從東閣邀真賞名似崔郎詠落楓

康山桂花盛開江纈雲招飲草堂同香海蘭雪聽

彈琵琶

弦上四聲秋桂馨山更幽昔賢留韻事吾輩續前遊跌
蕩高人意蕭疎狂者流江郎能愛客不惜醉千甌

呈曾賓谷都轉

歸臥青山客未能鏡中塵狀我先憎半生蹤跡空湖海
垂老心情仗友朋一笛西風花似綺二分明月酒如澗
煩君爲我招雲鶴親到瓊霄最上層

朱碧山銀槎歌爲賓谷作

銀槎銀槎酒一觴製者碧山家魏塘當時虞揭各爲壽
二公與我皆同鄉流傳始入退翁手朱朱施曹歌調長
鉅公製作讀已久杯雖未見神洋洋異哉四百年間物
歸我使君得收藏使君少小居同里使君風雅人瓣香
傳之席上競把玩尋源使者漢代張枯查高踞氣岸異
湖崑崙墟水色黃問渠葡萄可釀酒定然瓊現琥珀光
胡不海中摘星宿翻攜片石爲歸裝我今醉倒倚槎看
汝槎形狀浮大荒拍張侯腹一笑粲空洞無物奚能狂
我顛煙花二三月使君醉我三千場長嘯短詠未必讓

虞揭他年攜歸同飲華子岡

桂花初盛賓谷都轉置酒湖上勸客出遊同香海

蘭雪作

金粟香中萬點秋黃雲一片擁山樓詩人貪說春花好
月窟仙妹愛此遊

畫橈輕撥一江雲跌蕩湖山氣不羣雅格未曾經見慣
幾人妬煞杜司勳

暮雲樓殿梵鐘沉秋在園林春在心短笛一聲花欲舞
笑憑石檻和長吟

題張秋厓是是圖

天花散處着因緣不到情多不解禪坐冷三生盟石上
風聲竹影盡嬋娟

分明記說木樨香又現紅蓮世界粧身在色聲香味裏
莫教喝破喜歡場

瀕行矣都轉復留旬日賦此呈謝

老矣江湖別最難感深知已更盤桓慚隨東閣論風雅
獨許貧交托膽肝此去預謀先所往重經還訂後來歡

景賢一片樓西月回首江天夜夜看

子所居名景賢樓

葵書屬草卷三

七

信州道中

點點寒鴉下夕陽灘聲不斷暮天長白雲無數堆紅樹
水複山環認故鄉

舟中夜坐

水落灘聲壯山寒雨氣昏那堪孤棹泊聽此徹宵喧舊
夢人千里新愁酒一樽自來哀樂意默默向誰論

章門旅舍除夕

二年浪迹滯天涯名利驅人老鬢華終歲平安原是福
異鄉歡笑且爲家玉樓簾外春將動紅燭尊前影未斜

今夜故園小兒女望歸猶共卜燈花

菜香書屋詩草卷二

六

菜香書屋詩草卷二

菜香書屋詩草卷三

南城吳煊退庵氏著

對酒

半世求閒不使閒東風羞上鬢毛斑春回岩谷寒應減
雪滿江湖客未還歲月驚看隨逝水耕樵終擬住青山
胸中梨棗生何日且借金尊一駐顏

鄱陽湖值雪用東坡聚星堂雪韻效歐陽體

限不以鹽

玉鶴鷺絮蝶飛舞之類爲
比仍不使皓白潔素等字

北風三日吹篷葉天工昨夜試春雪曉起湖波一鏡平

菜香書屋詩草卷三

一

空光上下行踪絕沙頭飄轉濕還旋枝上橫斜凍欲折
天空野曠山有無唯雲與水爭明滅我欲拂衣強起行
伸手真如肘先掣怪底舟人喚不應破帆短柁冰絲纈
幸攜錦瑟佐餘歡坐對青尊看霏屑憶昨鴻爪印春泥
沾袍欺帽風光瞥蒼鬢無成一艇歸人生踪跡那可說
浩歌天地發陽和不使肌膚凍如鐵

風雪舟中寄懷胡香海揚州

苦憶竹西路春從歌吹來梅花三百樹今日幾枝開風
雪子能往江湖我獨回詩人東閣散可復念狂才

將出門悵然有作

乍喜衡門啓竹扉未將塵土浣征衣誰云兒女情難割
可嘆田園願尙違萬里夢回雙鬢改一江心遠片帆飛
青山兩月煩迎送何日勞生得息機

大徐訪胡尙木

言鼓章門楫中途就故人語深宵苦短別久聚彌新相
顧驚衰老甘心役賤貧山中原可樂子早厭風塵

筠州道中

一葉衝波出豫章溯江西轉指斜陽者番認得筠州路

菜香書壽草卷三

二

綠到天邊樹萬行

野店荒村不辨名小舟繚繞柳陰行青山寂寂頻啼鳥

初聽黃鸝第一聲

黑風夜半雨翻盆汶港橫流野水昏都向林梢避新漲
兩三家屋住雲根

三日舟纔百里移晝長唯有睡相宜午晴又趁東風便
也算揚帆得意時

初至敖陽講院作

濃皴煙樹碧浮天嶺路高盤雉堞懸江水怒流如屋下

客帆飛影到簷前
招朋恰好開
三徑橫榻長宜對
一編
萬里輪蹄今暫息
聽風聽雨意恬然

感懷舊遊二首

燕臺回首事蹉跎
搔鬢春風忽一過
牆外不堪花落盡
簷前空對月明多
香銷鴛枕驚殘夢
酒憶銀燈罷聽訶
我亦萍蓬無住着
離風別雨奈愁何

霜飛木葉下西風
瘦盡西湖十月中
詩社客歸江閣冷
酒罈人散畫樓空
有絲繡佛緣難續
無斛量珠遇尙窮
重過東隅看日出
寥天何處覓征鴻

過陳蘧石廣文小飲卽以誌別

寂寞齋居強自寬
故人尊酒覓盤桓
黃梅時節連朝雨
綠草堦除一徑寒
菜甲滿畦休饜肉
江魚入饌且加餐
明朝君又匆匆去
遲我東湖更盡歡

雨後遣懷

蕭疎雨過午風清
四月餘寒惱客情
愁似繭絲纒不斷
詩如春草燒還生
鳥聲啼冷千林碧
山色嵐開一桁晴
日暮東南頻悵望
白雲天外水盈盈

野望

開門煙霧積蒼茫野望高低一色涼雲裏舊山渾似墨
溪邊新水泛來黃却看江路愁行客回首田廬念故鄉
幾欲忘情謀一醉不禁簷溜響空廊

遣悶

不解趨迎工不治生產事汗漫東西遊此身一萍寄前
年太末歸昨歲廣陵至八口溷飢寒何以釋重累兒頑
學拋荒妻病色顛顛自來敖山陽百慮煎心志仲夏天
陰寒雨脚長在地彌月喜一晴十日謀一醉溪水泛天
黃牆下魚鰕戲霧暈沾衣襦草樹交蒼翠以茲蕭瑟況
逐處生壯悔離家寡素歡新知屬貌契出門將何之我
其如附贅拂衣起復休賒酒酣午睡

再簡李杏坪

人生有聚散百年須臾耳而況奔走間相遭皆萍水今
者不爲樂義馭無停晷嗟予傷蹇連青陽時暮矣願尋
尊酒歡與君娛文史君來我忘形我至君倒屣奚待別
後思寸心印千里秋風催客歸後會誰能擬

卽事

荒庭絕人迹風雨日淒然金盡甕先臥晝長僮已眠憑

虛一舒笑守寂自安禪欲問清江信白雲遠在天

大雨暴漲

昨夜溪痕滿今朝雨意濃一江奔竹箭對岸失山峰樹
杪長風急空中萬馬從幾家屋敲側無計鎖蛟龍

無聊

難攀佳客話晨朝長對孤尊慰寂寥夢醒鄉思方渺渺
吟殘風雨又蕭蕭穿林啼鳥東西換浸水苔衣上下飄
可惜湘東三品管攜來閒處寫無聊

易硯詩呈陳季馴解元

菜香書屋詩草卷三

五

我客揚州城賢豪傳播公子名我鼓西江棹官閣乍覩
丰標清江天梅花一萬樹晴雪又送歸帆輕頗聞有詩
可易硯畫圖十丈雲煙生有弟狂吟筆酣飽讀之技癢
心怦怦文園況復盛賓客不思脫穎非人情邇來山城
太寂寞石田莠驕蕪不耕溪雲一片夢枕上微吟忽作
蒼蠅聲投君縱令等瓦礫獲報且願珍瑤瓊況今雕搜
付妙手必有雅集飛銀觥偏師試一撼壁壘後勁或者
稱強勅蘊隆蟲蟲吟浴汗訪君更欲凭軒盈畫簾清畫
對端友石君石君鑒此盟

將之清江舍弟照南官舍

兩月羈縻一出難
籃輿明日指江干
喜從詩酒尋吾弟
甘得齏鹽作冷官
對榻便須留十日
岐途底用感千端
顏衰趁此身猶健
歌嘯能豪且盡懽

又別知己

浪遊非得計
別緒難裁柔櫓一聲下
江湖秋水來騰
攜詩滿篋長憶酒盈杯
寥闊多鴻雁相憑託
往回

簡商剡溪

驛路槐花夾岸黃
閒蹤偏逐片帆忙
暮雲回首西山外

秋水長天滿夕陽

絕句

螢火雨然屋蟲聲
寒逼牀不知愁思起
翻怨夏宵長

出門雜記得三首

輕車遠行邁
匆匆戒行李云是赴公車
妻孥多色喜但
囑慎霜寒而不憂
道里親賓重科名勸酒多且旨
去住兩不謀
中心愴難已
崩絛束在腰半醉拂衣起

遠道四千里行程但苦遲
行程亦未遲所苦多路岐
路岐實險巖逼仄寒風吹林深
虎晝嘯巖邃猿夜啼
僕夫

力況瘁中道當語誰但去莫復顧前途應坦夷

時迂道至浦城

百里不逢人但見羊與牛林木多繁鬱水各東西流丈

夫重意氣舉足慎所投急瀨魚不藏安問龍與虬惡陰

無好蔭況復荆莽稠迴車日未晏浩浩江水頭

仙霞嶺

蜀道捫參井茲山勢未降半腰雲氣合萬壑水聲淙虎

節通

皇路神功甸海邦

絕頂祀漢壽亭侯疏球貢使俱有匾額

平生遊

歷處天險已無雙

浦城道中

茶會書馬草卷三

七

曉起山雲凍不開籃輿穿嶺入雲來東風作意頻吹雪

林壑迴姿盡放梅野店煙寒籠古樹關城戍冷剩空臺

新年不用嗟行役總把心情付酒盃

次日復得一首

入山陰雨出山晴快意東風一日程澗雪乍消寒溜澁

春田未動曉煙明頓于逆旅添詩意又見當壚壓酒情

前路定知新水活看花先計闔閭城

卽事

東風吹晴亦吹雨客子問天天不語窮崖雪片鷺毛飛

可憐濕盡征人衣梅花影似征人瘦獨向幽巖立清晝
日暮投鞭向酒家紙窗夜半生月華

蘭溪曲

儂愛蘭溪布郎愛金華酒郎去郎速回儂在江頭守
昨夜吹南風今朝風又北白浪打船頭雪飛行不得

巖瀨

人去釣臺空江流日夜東青山猶漢代寒雪有漁翁吾
道時應用千秋事不同書生慕榮利未解挹高風

青浦訪王蘭泉先生

四無山作鎮橋遠卽名村漁汊船通市田家水到門寒
光生潑潑海氣合朝昏一愜瞻韓願迂迴未足論

將抵廣陵先寄賓谷都轉

穴處少奇士聖世無隱淪京華策羣材冠蓋游如雲廣
陵衝車馬故人居要津梅花一萬樹東閣延羣賓我行
踐夙約勝賞追芳辰陽和衆卉坼品彙妍中春相別日
已久相見情益親舊游想歷歷光景彌鮮新摩撫蘭亭
硯酣飲銀槎尊歡言竟日夕樂意難具陳

閩門客中有感

六度金閨作浪游狂歌還上酒家樓春歸柳自多青眼
人老花先笑白頭千里別離驚舊夢新年煙月起閒愁
暖風晴日山塘路獨立寒江看鷺鷗

未渡江迂道至白下

才辭吳苑樹又上秣陵船到此猶岐路吾生非少年煙
青江听柳潮白海門天記得秦淮曲簫聲畫檻前

後秦淮曲

楊柳青青白下春斜陽畫得晚煙新渡頭坊尙題桃葉
記否當年打槳人

朝捲晴霞暮捲雲珠簾弄影映波紋紅顏都向尊前老
一話歡娛卽舊聞

家玉堂兄弟邀同泛舟二牖戲爲絕句

三月三日天氣新東便門外嬉青春扁舟略似江南路
流水河橋柳色勻

暖風吹皺水紋斜夾听紅旗賣酒家淺草青青煙淡淡
夕陽一片照桑麻

長歌行贈喻東垣兼調黃齋生

有客神清氣豪邁索我作詩兼作畫我畫未能詩未工

好事浪傳吁可怪賁生於我舊酒徒燕姬勸飲提壺盧
相逢識君風雅儒乃同放誕相爲娛興酣百罰狂歡呼
賁生名譽早君更紛才藻明眸皓齒樂少年垂垂白髮
吾慚老東塗西抹事偶然蚓竅蠅聲何足道方思投筆
事鞭筆几席那肯留新稿感君氣誼真薄藝聊復陳筆
墨所未到意匠先凝神我聞君素精琴理莫把知音求
俗耳請君安縵自操絃放筆爲君寫山水山耶水耶高
且深山水之志乃君琴我豈能知音我能寫君心天清
雲淨澄江月鸞鳴鶴唳空幽林還君此畫爲君吟知君
愛比雙南金賁生古亦稱豪蕩痛飲狂歌才奔放卷尾
和詩不可無靜對能令心目爽

法時帆大司成命寫詩龕圖并題其上

曲折開幽徑龕因詩得名何人推作者而我愛先生草
色碧於水梧陰低到楹高吟方有興車馬厭將迎
羅舍花鳥宅元亮菊松園到此稱詩客狂來借酒尊遭
逢青眼睽慷慨素心論薄技吾何有微名藉一存

悶懷

殘夢醒何處凝思獨泣然誰能消病渴長此抱愁眠落

絮猶纏樹閒雲忽在天別無埋恨法我意欲安禪

效李義山燕臺四首和韻

桃花遶樓柳垂陌風光作冶拋難得長衢夾巷羅新居
平明走馬邀相識燕語鶯啼紅樹西珠簾高捲浮雲齊
蕊珠綽約見招手回首三年舊夢迷紅燭未銷天未曙
別緒離悰夜深語拋殘紅豆去江南零落胭脂竟何所
腸回九曲腰肢窄門外梨花堆雪白三五二八失芳華
況乃風塵傷落魄淚是珍珠穿不起垂作長痕濕環珮
報君此心如可移西山石爛東枯海

右春

菜香書屋詩草卷三

七

雨絲垂簾簾不捲幽窗香氣氤氳見倚肩交勸酒飛空
櫻桃堆盤小金彈紈扇搖風小暑天湘紋疎簾光回旋
回看明月玉鏡滿輕雲如絮亦如棉千金萬戶吾何取
纏綿但感知心語影逐形隨暮復朝莫遣年光速飛去
漁人好住武陵源不疑世上波流渾長時飽熟青精飯
攜手雲中朝太君

右夏

銀河翻浪灑天濕黿鼉日暮乘流入烏鶩鵲散嘆無梁

織女悲啼河鼓急須臾變滅雲蹤遠爲誰躑躅爲誰怨
東流之水深復深相思淚溢滄波淺繡榻文窗鎖斷春
月華照冷錦重茵琵琶不作秦箏死淒絕天涯淪落人
欲將別鶴翻新弄古桐未調離弦重五更露下嗁鳴風
薄羅衾冷驚秋夢南北舊猶通尺素人歸不識歸人處
手中圖畫百回看終日凝思難問故

右秋

霜飛木葉隨風下伯勞孤棲鷓鴣寡豈無翠苑與華林
避彈何爲適於野玉梅鬪雪精神起芳根不斷花寧死
油壁青驄會有時扁舟古憶鴟夷子梔辛蓼苦味同概
蔗老甘回佳境在星光蟾影記盟詞愆期雷澤應歸妹
繡圍重幕護霜寒金貂暖勒髻光蟬只愁掌上隨風去
五夜熏爐不知曙

右冬

秋懷呈穀人先生三首

春氣臺閣煖秋氣林泉清以茲露華白憶昔廣陵城九
峰洗袂硯康山飛瑤觥誰歎趣高雅乃始拜先生浮雲
互南北歲月忽再更涼颺隨雁至聚處同燕京日有風

塵色時懷山水情古人重行樂吾久厭營營

我懷徐公幹傲睨天下士吾宗有璧人裘屐誰相比一時蓮花幕客至如流水先生真有道獨得風騷旨風動幡不動詩理亦禪理如味之有甘如音之中微

紅雲慵不掃花陰堆滿庭圖史娛清暇室盡芝蘭馨天涯重握手歡言傾綠醕晨夕許過從蕭散遂忘形西風下木葉愴然悲梗梗春夢一何短羈懷日已增我本印泥爪聚散知無憑安得山中酒長與共醉醒

昨宵

葵香書壽草卷三

三

昨宵翠被覺寒添燈影模糊月影兼青雀飛來疑絕島玉簫聲起隔重簾迴腸欲斷頻彈淚軟語初通轉避嫌倚枕分明真不幻任他窗外曉風嚴

中秋寄懷家人

摘果分甘興未闌秋澄水閣夜光寒窗前一片團圓月知有人從萬里看

感懷

壯歲無成老拙謀茫茫何處寄閒愁天涯涕淚憐紅粉野曠悲歌感白頭痛飲那能消百慮懷人容易又三秋

歸心日憶青山好岐路躊躇去復留

和韻同友人夜話

酒渴起殘夜更長語共深我無驅老法客有戀鄉心南
雁幾聲遠西風雙鬢侵未能消旅念復此對牀吟

次日再用前韻

濁酒不成醉都忘夜淺深一燈留瘦影對語共秋心家
遠書難達貧來病易侵有時還默坐垂首自呻吟

遲家書不至

久怪忘行客翻令憶別家一書遲不至八口累無涯鄉

夢關河遠歸期歲月賒霜寒催短景評泊到梅花

東垣與余訂交因作長句以贈

嘯不上孫登臺遊不泛鴟夷舸索米長安面鬢黑挾瑟
吹竽無一可歲月徒然馬齒加東垣乃肯兄事我我笑
東垣交何卑五陵貴客君所知我嘆東垣見亦早山中
儒生開懷抱榻來飲我酒爲我彈瑤琴中郎爨下收枯
桐彭澤弦中非解音君言丈夫不得志行將湖海求奇
士非魚知魚妙入微請更爲君論琴理七弦泠泠指下
鳴古來幽怨歸和平螳螂捕蟬殺機伏海水汨沒真移

情人生得失誰能定行藏我久安於命美人遲暮傷春
心痛飲高歌見真性胸中浩蕩樂天機與子訂交無是
非報君之意意止此嗚呼勿謂知音稀

題朱葑齋望岳圖

卽黃山

樓虛開八面面青芙蓉久向山中住不知雲萬重其
人高莫及何日往相從我亦能圖畫神摹到幾峰
萬里看山遍天都未遂遊神仙原有窟猿鶴足相儔飛
瀑穿雲瀉虛嵐漾口浮紅塵得幽賞疑在最高樓

丙辰出都

茶香書齋草卷三

五

破帽疲驢出帝京半肩自喜客裝輕舊交爲灑窮途
涕好事偏傳下第名蓑笠長終歸計得江湖垂老別愁
生時又將
遊粵西消磨未盡豪還在又聽鷓鴣弦指法清

宿遷道中鶴舫與余拈得一聯因用作起句各成

一律

平蕪千里綠殘照一江紅已近南來路偏多北去風愁
因寒欲起豪借酒爲雄客有忘機者高歌正許同

長歌贈張鶴舫卽以誌別

達者能豪愚者癡吾徒結交多瑰琦虛名浪走三十載

鶴舫訪我於京師初聞姓字心頗訝甘亭乃先早識之
冷齋飽飯發長興吾弟倡和千新詩碩人其頎貌清古
傾談彼我神俱怡性情之際有真賞相與無與非文辭
浩然從我遠行歸單車短劍雄襟期天空海闊發奇思
風前月下生豪姿胸中渣滓久不着妙來觸處皆天機
我恨識君當落魄如此相歡窮亦得丈夫海內有知己
一身何必論通塞風雨輪蹄事等閒痛飲高歌能本色
揚州煙月劇可憐君乃匆匆作歸客天涯去住總傷心
而我飄零猶路側君歸色笑承歡顏首藉無慚供子職

萬里投荒我別家知君能不遙相憶作詩抒素復言離
哀樂他時情歷歷人生氣誼古良難且與酣歌永今夕
鶴舫將抵揚州卽欲言別詩以留之

別時容易見時難好作揚州十日歡煙月有詩皆勝賞
湖山借酒一閒看未愁人老先愁散且趁花開莫趁殘
後會茫茫知未定相期努力各加餐

賓谷都轉新築題襟館賦呈二律

題襟我先至築館我遲來舊徑一相過疎櫺九曲開
簾香霧重浮簾綠雲迴吟憩永晨夕慚隨大雅才

自笑飄蓬久三來廣廈遊青樽頻對酒白髮已如秋夢
繞江南樂行生桂嶺愁將有廣西之行誰能別離此賓舊總風
流

揚州楊柳枝詞

愛他約束似纖腰舞盡東風一萬條杜牧重來頭已白
晚煙疎雨對無聊
曉風殘月按歌喉憐是春韶怕是秋十里竹西歌吹路
不因詞客暗關愁

爲蔣伯生寫邗江贈別圖并題

菜香書畫詩草卷三

七

客有高談者隨風珠玉生讀書一萬卷不肯下公卿
我自金臺來君別廣陵去相逢燕與鴻前路知何處
今日綠楊城明日寒江水離思畫不成惆悵斜陽裏
題郭蓮生種蕉別館圖

高影一庭碧晚涼風借秋偶然成小住終日對清幽入
夢香俱靜濃題翠欲流頓令思水閣予所居有水閣新綠正關
愁

文信國遺硯爲賓谷主人賦

硯爲袁簡齋先生所贈

硯修廣各三寸餘受墨處微凹底圓而凸象蟬
腹左邊至頂刻謝阜羽銘其文云文山攀髯之

明年登山流寓臨安得遺硯焉憶當日與文山
象戲譜玉斲金鼎一局石君同在座右銘曰洮
河石碧於血千年不死長宏骨款識皐羽二字
行書極瘦逸簡齋貯以檀匣而識其原委於蓋
云乾隆丁未十二月杭州臨平漁者網得此硯
於鼎湖王仲瞿居士舟過相值知爲文山山故
物以番錢廿圓得之轉以見贈予仿竹垞詠王
帶生故事爲作匣兼招詩客各賦一章甲寅六
月望日袁枚記於小
倉山房年七十有九

題襟新館重相見主人示我信國硯水裏蛟龍不敢藏
匣開古色生精光厓州閣慘海雲黑餘此宋家一片石
當時若無皐羽銘誰識寒森瘦骨青玉斲金鼎豈戲然
局中成敗寧非天此硯沉埋數百載模糊尚有墨痕在
碧血已化土花飛精神應與硯同歸知我使君能護惜
如對先賢動顏色邗上詞人幾詠詩俯仰遙生異代悲
還公此硯讀公作疑有英風天外吹

九峰園小集卽席賦

湖上晚風清餘霞一縷晴開軒支翠爽酌酒照花明徑
曲人穿影林疎鳥散聲意中哀樂異眼裏別離輕後會
誰能定前途感易生各將古交誼珍重此時情

登金山放歌

海上巨鰲負不去山中疑有精靈住我聞山似蓮花形

到底孤根着何處焦山得秋氣金山氣乃春焦山古處
士金山如貴人此語雖創實平允我知山靈不我嗔叢
林紺宇搖金碧妙高臺覽周八極萬里長江入胸懷天
與東南壯奇特六朝煙雨飛冥冥未改扶輿一點青中
冷之水淡無滓宋元戰血不能腥江中見怪原非怪火
龍吐珠照昏晦水所不測理則常東坡險語驚愚昧今
我遊此非偶然茫茫千載萬載前江流至此狂不得鳴
呼一柱真擎天

遊焦山二首

菜香書齋置卷三

九

海天江盡處一髻擁波心日月摩孤影風濤答梵音苔
碑晴歷歷蝸室晝陰陰來欲爭千古塵襟未許尋
岷峩延地脉東望隔蓬萊海上槎何遠山中鶴未回滌
鬢方賞靜弔古欲生哀天外聞吹角難禁暮色催

桐廬道中

前山復後山兩岍青紛沓一氣蒼翠中碧水流寒峽厓
樹挂白雲澗壑飛秋葉來帆去不知萬轉峰重疊十年
七過此塵事日煩雜來往急行途那容幽賞愜茲焉謝
時務息心理釣楫豈云仁智樂足供耳目接日暮倚低

篷西風吹白袷

中秋與家人讌飲

綠鬢相看各白頭南歸暫此散離憂酌君明月逢今夜
悔我浮名負十秋兒女功成難滿願田園福好要前修
宵涼且話團圞樂情是相如早倦遊

菜香書屋詩草卷三

三

菜香書屋詩草卷三

菜香書屋詩草卷四

南城吳煊退庵氏著

月夜水閣

薄暮微醺醒鈎簾倚檻前
花香蒸水氣月色靄春煙
蕭散還今夜蒼涼憶昔年
憑誰寄幽賞悵望白雲邊

賞桃花得二絕

曉鶯啼上柳梢晴聞道
花開照眼明昨夜東家能
好客分箋翻苦得詩名

袞屐風流盡少年老夫作
戲也留連桃花休更嘲頭
白

菜香書屋詩草卷四

一

賭酒飛觴我亦仙

王埜樵招飲醉歸作

暖雨疎風過午晴惱人
春色太分明愁腸正欠三
杯潤稱意何來一箇迎
曲徑地偏畦菜足幽居
屋傍柳陰清接籬倒著
無拘束爭笑歸途醉態
橫

醉歌行

燕臺客散春花空此身
飄泊如飛蓬昨夜歸來
家四壁浩蕩天涯傷逼
仄何以解憂惟杜康江
樓有景收江光狂歌自
抱甕俯仰浩氣能與酒
低昂飄飄逕向江頭醉

空明萬象開心志萬里晴煙裊柳絲一窗暖景熏花氣
我生事只付悠悠去日難追來莫愁興酣恣意發長嘯
斜陽倒射紅簾鈎須臾江風吹白雨雷動滿盈魚龍舞
遠水千層雪浪翻遙山一角濃雲補天地陰晴忽復移
人生遇合會有期男兒怕向江鄉老拔劍驅車就長道
客于野別墅招友人小集

畫意詩情寄郊野名園正合著吾曹樓遲無悶心原曠
風雨能來客亦豪一徑煙濃人影綠侵階苔滑屐聲高
青尊盡日酣知己忘却關山旅夢勞

不寐

茶香書屋詩草卷四

二

花影一簾靜虛堂欲二更月來池上白風過竹間清老
眼昏殘醉孤燈動旅情夜來無好夢獨坐聽雞鳴

題余東浦停琴亭月圖

雲影露微月遂罷竹間琴芳情寄清賞立轉東廊陰寂
寂如有托迢迢彼美心筆妙不能到更闌萬籟沈

喜晤張鶴舫於南州寓齋和舍弟韻

邗上曾爲載酒遊揚州別後又南州來因吾弟聯佳會
天借新涼似早秋花徑尊開香在手瓜棚茶熟月當頭

放懷且共商今古老大飄蓬我獨羞

樟樹鎮七夕

青樽獨對可憐宵天際孤帆去已遙我是懷人隔秋水
也如銀漢路迢迢

五十生日自壽

今年歡笑復明年歲月閒中別有天好夢酣時聞飯熟
孤花開處向秋妍窮愁不死吾原福寒暑無侵此卽仙
蕭散渾忘身在客舉觴一醉興陶然

將往大溪渡訪劉綬珊途中作

菜香書齋詩草卷四

三

雲散晴空水不波扁舟東下意如何江邊紅樹生秋早
天外青山入畫多綠草澹光團白露孤帆遠影挂明河
故人家在蒹葭外十六年來此再過

至餘干卽事

落日餘干一繫舟且憑登眺散閒愁樹陰帆影圍城堞
山色湖光上酒樓痛飲未宜張白眼狂歌合自笑回頭
兒童休訝衣冠古我老天涯慣浪遊

東山眺望

仄步東山上憑臨萬井煙頽城低見路平壤繡成田日

落搖秋水山光畫碧天舊知風景好餘韻緬先賢

山右書院

朱子註離騷經處

阻風舟中放歌

北風撼地吹浪高於天使我行不得進夜不眠霜寒秋
氣砭肌骨惡客前宵盜我衣裳單囊中斗粟杖頭錢家
有啼飢號寒之妻子四顧湖天蒼莽心茫然急呼酒出
奇策且高吟日未晡

再宿湖渚得七律

秋冷湖天雁鶩寒霜淒洲渚秋蘆殘粗風羈我留三日

菜香書屋壽草卷四

四

薄酒隨僮勸一餐情到愁時翻憶舊人當老境只圖安

片帆又挂章門月却向誰商去住難

舍弟遊蘇未歸

前為張古山寫桃源撫琴圖補題卽寄

古山初學琴索我作新畫桃源有景足未到位置煩君
商眼界平生早是住山深三間茆屋藏雲陰岩空谷邃
發清響竹籟松濤生古音不從弦上求宮徵抱向幽厓
聽流水自然流出性和平斯非弦旨真琴旨當時悔不
從君遊石邊寫我漱寒流一洗從來箏笛耳終歸謀策
麻源幽今日題詩遠相寄知君進業臻純粹山靜飛疑

鸞鶴來夜闌聽恐妖精至

桃源古山所居村名

言歸

老病思歸切霜寒畏路難
驅車當落日買棹赴河干
細雨秋帆冷孤燈水閣寒
遙憐嬌女小知否問平安

感懷

瑞金作

水盡山窮復此行
荒林啼遍鷓鴣聲
舊交握手悲歡集
失路吹簷涕淚橫
夢裏榮枯誰作達
愁邊歲月絕無情
商量故是歸休好
且爲詩人緩去程

五古一首東謝沅圃危東柯

菜香書屋詩草卷四

五

詩人得元氣浩盪流心胸
四序各有應發生滋不窮機
緘一已碍百轉不能通
所以達觀人養性先和融
境地隨所得要以抒吾衷
吾少事飢走結交多才雄
去年見鶴舫低頭拜下風
同車迭唱詠談論証異同
此心旣活潑終日無戚容
爲我誦東柯尤稱沅圃翁
積時生景慕有約追芳蹤
看張大旗鼓或以偏師攻
今冬綿江上歡喜一笑逢
露淨蓼花白霜飛楓葉紅
謝翁年七十鶴髮扶長筇
危子貌古樸朗朗聲氣洪
各自安恬澹嘯歌蓬廬中
篇什富筥篋內修得外充負
智乃若癡負才乃若

庸二子克葆素而我獨倥傯清機鬱不發日日頻書空
吟壇聚今日主人春酒濃且自開抑塞高詠薄蒼穹耕
山有本願老矣長過從

同鶴舫夜話

破除萬事細論文尊酒清談到夜分陋比貧家搬舊物
了如天宇淨浮雲久經燈火親鉛槧都有關山歷見聞
今日商量較身手剝蕉抽繭總輸君

南州寓齋聽雨與舍弟話別時予將遊京師卽送
舍弟赴大庾學博

菜香書屋詩草卷四

六

聲聲簷滴漏聲殘聽雨空齋春未闌南北路岐書不易
弟兄老境別尤難回頭歲月猶堪味隨分齋鹽且少安
他日課耕兒輩得兩翁白髮足餘歡

晚泊錢塘江

萬櫓一聲下危橋爭泊船海天環地濶江月浴潮圓蟲
響秋林碧人喧野岬煙西風最蕭瑟客緒不成眠

錢塘觀潮

浪湧轟聲勢若雷前波蠹起後波催直教天地秋容壯
真有英雄怒氣來萬里流雲連島嶼一江飛雪濺樓臺

海門倒峽言堪信鐵弩如何射却廻

西湖遇雨

湖山忽漫暮雲橫細雨模糊四望平
雉堞半圍濃綠暗樓臺一筵晚風生
白波穿荇吹無迹小艇浮煙畫不成
大是催人蓑笠興西溪鷗鷺早同盟

將謁曾賓谷都轉先投此詩

裘葛蕭然老此生不干榮進不逃名
胸中亦有千間厦夢裏頻虛一尺衡
半世江湖驚落魄何年蓑笠穩歸耕
無端四度邗溝水最是難忘舊雨情

葵香書屋詩草卷四

七

高館題襟大有人近聞燒燭更延賓
舊交自愛陳蕃榻知我能憐管子貧
明月樓頭晴似畫荷花湖畔氣如春
公真雅量容疎放一笑相看興又新

江樓夜雨

急雨帶江聲高樓旅夢驚不知秋露白
斗覺夜寒生舊恨餘香冷新愁中酒輕
一燈異喧寂孤寄闔廬城

虹橋舟泛有感

明月依然好湖光一櫂同秋空山色裏
寒到酒杯中舊事慚鬢髮浮生寄梗蓬
猶餘豪宕氣一爲激長風

客懷

西風颯颯感衣單誰念邗江九月寒千里夢魂鄉路冷
一庭霜葉客心乾愁時翻厭餘生在老境猶思立地寬
珍重故人交誼古家書且爲報平安

送蔣師退歸南昌

南州送君出廣陵送君歸相見各匆遽不語心依依秋
風一蕭索江上孤帆飛入門且歡笑家庭無是非

戲答孟姜

題襟主人有戲代
送遠曲因答其意

風雨爾莫愁飢寒吾不死握得千金歸及汝樂田里

荊書屋詩草卷四

八

阿爺見我笑阿娘淚如雨淚是思女情笑更爺心苦

贈古華陳太守畫扇遂系以詩

京華邀一顧廣陵茲聚首官閣舊賓筵湖海十年久侯
也經濟人昔出湘南守氣象偉洞庭雲夢吞八九鞭石
不棄頑交温到詩酒

先生有八雲石
邀同人賦詩

浮雲庵忽間相見

自驚醜我從江上來山雲攜一斗願言揚清風姓名記
下走

陳古華太守招同江都楊雲齋甘泉孫伊圃兩明

府讌集卽事賦呈

題襟聚賓客湖海多賢豪相逢陳驚座邗上秋雲高雲
石互酬唱健筆斫巨鰲公詩清鶴唳我愧寒蟲號竭來
赴文譙高館延英髦座中兩仙吏齊盟主風騷性情一
已愜投合如芳醪品題古墨妙辨晰窮秋毫激賞到薄
技過情徒虛褒紅燈明華席皓腕斟葡萄夜氣忽已深
霜威襲中袍瓶菊影橫篆簷月弓離弦相知樂莫樂一
散心鬱陶

禹鴻臚追寫鄜湛若抱琴遺像

世上知音竟誰是騎驢莫入華陰市猩啼鬼嘯窮荒愁
抱琴歸向圍城死赤雅書續嶠雅成天昏海黑垂姓名
胸中奇氣不可狀空留遺貌瞻先生

黃葉

幾日西風變舊顏蕭蕭孤賞寄林間滿天疎雨明殘照
一角黃雲補亂山信到榆關人已老金鋪祗樹佛應還
劇憐雅背衝寒色伴我吟心上閒

西涯詩爲法大司成梧門先生賦

祭酒居京師之積水潭上考其

地爲李長沙西涯遺趾寄詩徵和時客揚州因作

昔我遊京師數過先生宅道出松樹街詩龕許前席橋

高名莫辨寺古尋未獲一水瞰城闌上下煙光織柳影
蘸遙青花光點深碧那知卽西涯風雅舊遊息世人貴
目前誰肯問遺跡自非好古心求之不可得

愛才復下士文正乃名高樂府張別調縱橫詩中豪擢
拔足自喜羣附來時髦城西愜幽賞有屋遠塵囂詩酒
旣云適往還寧自勞鐘磬答餘響松風吹暮濤澄心樂
止水景物淡相遭寂寞三百年無人歌楚騷

大雅振宗風學者推祭酒爭先求識面豈徒仰山斗冲
澹和平間追陶軼韋柳邗上讀新詩春明回首居是

西涯鄰身應西涯後經濟與文章卓犖同不朽考古念
先型証據羣疑剖令我思古人亦知今人否微風吹遠
林明月窺寒牖依稀積水潭荷花落吾手

劉安妃髮繡東方曼倩像

不買五色絲不繡玉清面十指纖纖運神鍼一髮縈旋
盤曼倩曼倩風貌夫何奇胡取懸珠編貝姿蓬瀛安期
不可致非有譎諫誰開迷道君有道如漢武靈素無靈
蹈且舞太師蔡京太尉童書名玉冊神霄府深宮密語
浪傳聞我知妃心用最苦眼裏何人能滑稽使我君王

光烈祖兵威未敢勒燕然十六州失舊疆土當時倘亦
好神仙九華玉真侍帝前縷縷烏雲下明鏡金母麻姑
貌可傳寧爾遠追漢諧士迢迢世異一千年毋徒貌賞
心力研生綃尺半神氣全想像停鍼含諷意齋心應見
賢妃賢

宋繡東方曼倩像

曼倩曼倩爾何人神仙詭譎同一身懸河之口恣諧諷
武皇乃竟有此臣彷彿遇之迹求失誰其織手鍼能神
龍眠筆意畫不到烏絲細縷光如雲飄飄認是華陽巾

菜香書屋詩草卷四

十一

衣疑天衣非織紋豈從安期回海上或者一見東王君
靈丹偷服不死藥丰采煥如蓬瀛真以手捫之滑無痕
是宋非宋繡絕倫欸識不曾記誰某時代要亦隨見聞
盥手展軸香微熏滑稽玩世神猶存美人細意知何在
遺之風雅留藏珍

思雪用東坡祈雪霧豬泉韻

消寒
同詠

我欲含哺兼鼓腹夏雨時行冬雪足今年天暖半冬晴
不使無衣對寒哭要令滕六一收功萬里花飛遍地軸
遺蝗千尺徵來年大書歲有稻麥菽紛紛快觀同雲陰

油油待看春郊綠胡爲霜露零亦稀將以困之問岳瀆
汲井頻聞水涸泉寒裳不見冰塞淵關山載途滑未滑
日夕乾風顛更顛我生半苦謀生急未肯悲歌仰天泣
應時爲瑞定不虛灑竹飄簷此其及上升天氣元陰凝
行空莫使龍公蟄待我東閣小尋梅多事梁園一戴笠
歌詩咏雅樂無疲如淮之酒流銀匙

消寒同吳毅人侍讀魏春松太守王鐵夫學博暨
題襟館諸公分得詠了雲鵬授傷圖

不立語言與文字如何說傷開神智皮肉骨髓得者誰

要識西來真大意眼前摩頂是何人母豈摩耶子舍利
茫茫四萬八千生小子能參第一義一花開五葉葉葉
垂真諦一蘆浮渡江面壁持不二想諸有緣俱夙因碧
眼觀空識根器迦羅一自付真詮正法眼藏傳不傳二
百年後衣鉢絕世上久無上乘禪誰窺妙相珠光圓紺
衣振錫驚龍天旁臨震旦作初祖嗚呼象教今綿延

將入都門留別曾賓谷都轉

陽氣鼓羣動栩栩從風起那不爭天和畢竟出者是春
風揚承明先後驅車駛熱心耿中夜我亦整行李豈不

自慚衰無端生色喜青山隱未能江湖樂如此丈夫無
所成何以謝知己

知己古良難所感固金石才藝樂相成飢寒借餘力數
至不辭煩題襟三作客旁觀或歎羨我翻有驕色是誰
實使然能無佩茲德古亦言報施自顧心內默去去鞭
老駘安知不辟易

辟易古戰場書生真笑闕辟易在文陣毛錐知可用昨
日聞西師妖氛就縛控巴蜀安耕桑山川通職貢上紀
聖德碑再拜吉甫頌舉目得大觀閒言或微中周旋禮

讓問安得隨羣從

羣從豈異人幻想徒顛倒不惜聞者譏我自抒懷抱白
首事遠征雨雪曳泥潦久分散置身復上長安道東風
不借吹何由起枯槁握別更奚詞至厚刪浮藻德業日
已崇祝公顏色好

題譚子受英雄兒女圖

寶馬珣弓五色鞭去時容易別經年慙慙雙勸臨岐酒
那不回頭一點然

筆鋒已足掃千軍投筆還圖馬上勳看盡陌頭楊柳色

可知樓上正思君

雨中有懷照南

官大庾
學博

夜雨滴寒響匡牀夢穩遲忽驚身在客遠憶天之涯南
雁來何日梅花開幾枝他鄉聽蕭瑟都起別離思

春花秋宴曲

秋花滿地紅不掃鴻雁聲中秋色老是誰管領布陽和
九月春光枝上多碧荷湖上傳觴客金帶圍爭醉瑤席
花事邗江今又新重陽高館增詩格園林得地開有時
蜂蝶今朝知未知酒酣我自發狂笑仙人兮來何遲

茶香書屋詩草卷四

古

驅蠅詞

鼓翼搖頭附炎熱小物真能污清潔世間此類斷絕難
費吾綠豆指空彈小閣垂簾睡未穩塵尾初停却復返
生憎長日飛營營我欲塗鴉十步遠笑爾空鑽故紙來
雖有香氣徒徘徊紈扇不搖冰在室於焚於棘胡爲哉

晚虹

何處飛來影明垂雨脚東陰陽蒸水氣雷電斂神功一
掃歸雲濕遙爭落日紅農方憂旱魃莫挂碧天空

水禽

飛去又飛回波光一鏡開蘆花啣欲起魚影掠頻來
繖原知避風濤了不猜高空有鷹隼莫使羽毛摧

聞鐘

客睡何曾穩疎鐘打夢殘一聲催月冷五夜逼秋寒
世界空無礙人天接總難浮生餘白髮早願托身安

漁火

水面亂星光菰蒲夜色蒼江風吹不定山月照還涼
我欲浮孤艇相將問醉鄉釣竿生計足舊約那能忘

古戍

野曠無人住曾經豺虎驕到今餘廢壘荒草見寒樵
設險知何日時平非一朝誰堪聞畫角秦路莽蕭蕭

水花

娟娟風露裏長寄水爲家曲渚聞香遠橫波蘸影斜
心能經久洗骨不點纖瑕開落頻隨意孤根老歲華

昏鏡

盤龍多剝蝕物象總潛形太乙下何日金精頑不靈
冰輪蔽雲霧粧閣負娉婷老眼年來似磨揩涕欲零

菜香書屋詩草卷四

菜香書屋詩草卷五

南城吳煊退庵氏著

讀帶綠草堂遺稿呈法祭酒梧門先生

昌黎山斗世交推永叔文章母是師
騰得一編遺教在人傳帶綠草堂詩

自向秋風寫白雲中天籟發清聞
祇應上界留真本

稿中口授心鏤不可焚
跋內太夫人稿每值朔望輒引火焚去

零星斷句集成圖雨寫霜披知也無
二十年來辛苦志

藐孤今是世名儒

菜香書屋詩草卷五

一

詩龕舊許往來頻風雅重邀笑語親
若使當年依絳帳登堂先拜太夫人

為金手山畫夢中雪意悼亡并題

糝糊香色認初看只記花開莫記殘
夢裡渾忘天是雪

三更不道布衾寒

舊譜重翻畫意難
前有二幅一畫探梅意一畫雪中雪意幾多長恨似雲

漫我憐紙帳魂香處一枕相思入骨寒

憶家

庾嶺梅花海國雲一家幾處悵離羣
關山望雁音書少

風雨思兒涕淚紛無藥能將愁病療長貧難博笑顏欣
燈花卜罷占鳴鵲更念閨中早夜勤舍弟官大庾
兒子遊粵東

曾賓谷都轉四十初度

五十我不官四十公持節同自山中來頓覺霄壤別憶
昔與同遊逼人英爽勃氣欲邁等倫詞早驚先達讓子
出一頭嘗聞魯師說謂厚翁
夫子上下廿年餘崢嶸遂今日

大庇天下寒鄉黨尤堪述燈火擴膏油區畫增舊設都
轉

捐廉俸增廣江
書院額數往者計偕人邸隘不容膝今當入

覲初復謀置新室京
都南城舊館湫隘
都轉為增置新館自我所見聞事

榮香書屋詩草卷五

二

事過前哲世豈乏功名崇虛或遺實公業振江南於鄉
更無缺而我數相依回首內心熱顧影一激昂頽然蕭
白髮富貴會有時學行吾心折荷花紅滿湖我來多六
月會
試出都經
此必留數月正值懸弧辰歌詩燦雲列我請操土音
爲公陳瑣屑繡衣自捧觴先爲高堂悅

泛舟湖上簡諸同遊時予將有石港之行

雨後新涼一借秋塵心洗淨作清遊鬚眉并入湖光綠
林壑都從客意幽楊柳煙深閒繫艇荷花風動不驚鷗
萍蓬且盡知交樂明日相思海水頭

將赴石港阻風

一舸東下趁朝陽，無那東風江上狂。
濃柳隔城難蘸影，殘花墮水不成香。
驅蠅長日惟思睡，開卷孤尊自賞芳。
遙指海雲三百里，青天半角望茫茫。

舟中七夕是日立秋

天上說佳期，秋先報客知。
涼風如有意，此夕最相思。
影落荒江葉，家憑巧婦炊。
節時經再換，行道尙遲遲。

雜詩

阿父生我晚，阿母教我勤。
我生八九歲，百病纏一身。
蹉

草香書屋詩草卷五

三

跚歲復月，聰明亦誤人。
天機雜嗜好，馳逐勞精神。
亦有純袴習，所幸家長貧。
以茲肆力學，艱難博一巾。
四十始鄉貢，浩浩京華春。
夢入天門遊，既至風折輪。
庚戌已榜錄中書後
止停三蹶復三踊，屢薦不第意氣不自振。
躑躅日行路，悠悠多苦辛。
摧折不自惜，何以報雙親。

閒居憶行邁，遊蹤不可詳。
九州吾歷六，所欠青雍梁。
奮焉思遍騁，縱橫遊俠場。
顧茲始衰年，汗漫非樂方。
仲氏見獨早，未老先退藏。
白莽淡於進取盤餐飽首，藉妻孥日在旁。
惟我多跋躑，行止兩莫商。
近來如縛束，筋力不能強。
作

書報吾弟聞應心惻傷

故劍求不得新縑織久工蘆花不作絮兒女三人同向
禽願粗畢庶幾浩歌終天不予清福老人荆棘叢枯楊
忽生稊自笑心猶童牀頭新卜瓦啞啞襁褓中婚嫁方
自此歲月來何窮子髮其種種子憂其冲冲

事父我未能焉敢求乎子賢不肖皆天聽之而已矣玉
樹謝家寶蓬頭王霸恥我子介乎中亦不甚俗鄙書畫
師吾弟未許拋文史一衿擬天階家居苦甕底薄作嶺
南遊或告能負米前者報平安岐路得之喜慎勿貪囊

菜香書屋詩草卷五

四

金世事寧有此以我涉世艱益下思兒涕

中歲好游藝尤於畫理淺林厓寫幾層家數了不辨竭
來時示人謬謂得書卷遂以托業遊潑墨無寒暖鄉國
歷崎嶇舟車數往返豈謂壑難填苦未登壘斷得寸則
寸耳截長不補短七年救我飢一個曾都轉

海風三日吹蕭蕭動林木萬彙作秋聲淒然憶巖谷此
身浮雲寄終須擬歸宿昨日營菟裘尙欠三間屋夜來
夢鄉園有花兼有竹弱孫牽我衣嬌女抱我足老妻訊
平安小婦供茗粥歡笑生一堂荒雞鳴啞啞揩眼燈未

昏身在滄江麓

薄暮翠雲樓上

樹高遲得月涼引一樓風北望川原鬱東浮海氣空暮
雲過水濕返景射窗紅客有茫茫感何嫌賦未工

道興

入世曾無補遊蹤偶結緣林泉清暑氣樓閣敞晴天客
許科頭見閒容飽飯眠良宵猶未足月欠一分圓
書院暫爲公廨移住運判署西廳得詩二首

忙處閒人到底閒移來官閣俗能刪虛窗交翠松爲幔

葉香書室詩草卷五

五

列岫飛空石疊山花氣撲簾香細細泉聲過耳響潺潺
少焉東月先西照借與先生自掩關

壺觴雅酌興陶然羽扇蕉衫曲徑前千萬虫聲秋各媚
兩三客影老尤顛珠多滄海將求網次月初進諸生月課地近瀛

洲可學仙此會莫教容易散熱場輸我是安眠

石港文信國公祠

城巖不隔孤臣路海濶難拋帝子恩風雨土圍神鬼護

公紀年錄趨高郵通州渡海歸江南又云外旣顛躋內
又飢渴至半山土圍糞堆中北騎數千自土圍東至忽
大風雲雨昏暝馳騎西去遂得
免又云若有鬼神鼓動其間者
弓刀燕市地天昏紀年錄公

受刑日大風埃霧日色無
光都城門閉甲卒登城
狼山下
憑弔賣魚灣口渡精靈來往有潮痕
金將軍名應同公走
狼山月冷將軍慟
通州守楊練使師亮館公於郡衣服飲食舟楫皆其

秋聲

蕭蕭颯颯到江關萬里吹來自往還人倚暮空疑泛海
天搖曠莽欲移山白蘋洲畔沙初旋紅葉中間鳥未閒
更是西征聽不得驚心笳鼓悴朱顏

題江片石詩鈔

名干如臯人

不事鉛華色自妍不施雕琢質尤全意中魂夢愁中鬼

菜香書屋詩草卷五

六

都是光明法界天

才到名高是劫魔古人詩好福無多直教五百餘年後

定有旁人喚奈何

題馮晏海詩詞

名雲鵬通州人

二李長吉義山詩才鑄一身路從幽險得生新掃紅亭外花

如海雨嘯煙吟筆有春

昭代詞人竹垞名錦蕃集子倚新聲君囊更有絲縑在

別費工夫織得成好用花鳥藥名連綴成詞

酬周菊泉見訪

聞階紅不掃，枉步影相於。十村同至有句能幽絕，其人正澹如秋森。山骨瘦風剪，一林疎坐久。不嫌寂此間，真古初

和陳十村中秋見招韻

每逢君卽倒金甌，今夜他鄉失客愁。人到詩壇爭赤幟，月明海上作中秋。但教得暇窮原好，除却爲歡夢總浮。我欲團圓聯勝會，明朝請更續清遊。

雲在蓬瀛鶴在天，忽因醉月想遊仙。姮娥應許偷靈藥，山桂重招結隱緣。髮影老殘燈影照，詩人才喜美人憐。揚州令節貪歌舞，兩度華筵遜眼前。兩容題襟館中秋是日皆演劇

葵香書屋詩草卷五

七

聽女郎擊洋琴

非絲非肉莫商音，金線安弦擊作琴。一曲歌喉半吞吐，女郎初解唱惜惜。

哀樂中年總繫情，憐渠意重博歡輕。扶風帳裏春風暖，此是垂髫女學生。

秋日泛舟野遊過霜林精舍分體得七言古賦謝

閻嘯月

水天上下搖空碧，秋冷蒹葭風策策。一舸浮煙下夕陽，美人招我瑤華席。朱檻銀屏花態妍，飄飄羃展俱神仙。

紅塵厭踏踏蒼翠柳影風頭聞暮蟬

平沙一一雁聲起剪碎秋雲落江水江水如油潑作春
野花的爍披紅紫冷冷清梵出疎林壇影松幡試共尋
問訊山僧供茶話屋外白雲深不深

沿流草浸芒鞋濕鴉啼日暮催歸急綠酒紅燈燦少年
大半平頭過五十玉笛橫吹聲破空可惜秋無少女風

珍珠一串觴交醉醃顏笑染胭脂

紅客有善丹青者
情爲寫泛秋圖

清漏丁東更剪燭綺窗窈窕吟還讀階下落葉悄無聲

蛩鳴一答空山曲河漢西斜酒尙醒報之却乏青瑤瓊

比量綠字稱多寡拍浮補我三千觥

題檢書看劒圖

我欲拋書卷腰間寶劒鳴長風驅馬去古道暮煙橫一
笑慚衰鬢還歸對短檠胡君先寄托用識杜陵情

題陳十村小照

今古豈云遙宇宙亦何大石渚着此翁獨開詩世界
我來石渚遊識得君家路非魚却知魚低徊不能去

鐘聲詩社分題

紫禁敲回曉夢殘一聲和磬落寒山沉沉禿寺僧歸後

欵欵疎林鳥散間，高扣白雲催月冷。輕隨紅葉過江間，
三千里外悲秋客。頓悟浮生兩鬢斑。

雁來紅

是日詩會
在門入館

一朵紅雲雁帶來，西風吹落古牆隈。不爭春色爭秋色，
知鬪清才鬪艷才。青眼有人收錦碎，白頭爲爾對顏開。
相看不飲休歸去，往事今傷首重回。

遣興

天邊鴻爪畫秋痕，樂事江南水一村。海鳥久忘紗帽貴，
草堂誰信布衣尊。山中紅樹延新雨，眼裏清才聚蕝門。
正好鱸肥香稻熟，談詩排日酒波翻。

菜香書屋詩畫卷五

九

飲周菊泉園林

一徑入蒼翠，蔚然松竹深。穿樓尋曲塢，聽鳥弄幽吟。
影綠餘髮花，光紅到襟翻。聞誇往事展齒印，留今
閣坐香風透叢叢。桂作秋一杯，傳蠟火初漏。下寒籌，露
氣拂簾濕，重聲依草浮。良宵樂不淺，欲去更遲留。

和韻答僧真如

面壁空山佛亦癡，空山色相未曾離。何如雲水尋因果，
一任風花管盛衰。舍利我聞傳在世，波羅彼岸到何時。

新詩似說菩提偈煩惱開除作了期

晏海爲綺席見邀作艷語謝之

短短疎籬淡淡花秋藏林外野人家門前一曲灣環水
不是橫江是若邪

越客千絲網結成圍團一座笑春生偶然比作香山社
白髮何人獨少情

席上口占贈桂娥

翠幔銀燈夜有煙桂花香裏見嬋娟無情恨是今宵月

不放光明些子懸

八月晦日也

菜香書屋詩草卷五

十

瘦同飛燕病同施薄薄羅衫淡最宜已是秋殘花事冷
濃春時節我來遲

一曲低聲淺淺斟當筵那不是知音勸孃切莫歌流水
流過門前便不深

東真如僧

熱心方可佛君是過來人隱到爲僧盡豪還結客真將
詩消壘塊杖錫閱風塵六合茫茫處偏勞轉法輪

我本悲秋客天涯倍起愁熱場隨處闋苦海此身浮貧
昨添黃口名今悞白頭前生論因果福命未嘗修

近喜聯詩社何人訪遠公菊開三徑賞客到一尊同捲
幔延宵月登樓數塞鴻不知瀛海外開關幾鴻濛

重陽前二日陳逸齋招同賞菊

去年春花秋爛熳題襟高館開詩宴

戊午重陽前二日題襟館桃花海棠

繡毬梅花俱開主人命酒賞之賦春花秋宴曲今年此日看秋花來醉魚灣處

士家處士有園剛半畝種菊開花大如斗秋風正好醉

泉明一尊先酌重陽酒我有三徑荒未歸東籬瘦影孤

斜暉去年今年霜滿鬢天寒塞遠鴻雁稀半生長向天

涯老窮秋搖落傷懷抱蓴美鱸肥樂異鄉衰顏不及幽

菜香書畫壽堂卷五

七

花好安得小隱如主人琴書清暇歡娛賓山妻供饌子
肅客家庭氣靄雍雍春花品最高無過菊黃衫白袷絕
塵俗招來佳客盡芝蘭那不爲君豁心目君身化菊菊
化君其人其室俱芳芬他日我攜山中酒就飲無煩掃
逕勤

重陽日卽事賦

東海川原多逸士重陽風雨聚詩人壺觴各舉情皆古

書畫交酬例又新

客以所藏隸書易畫

一笛橫招天外雁

遠客有書來約

過訪雙毫淡染座中春閒閒小向江樓立何處登高似此

身子畫重陽
登高圖

雨夜

雨聲蕭颯客心孤
亂打空窗點點麤
水并急潮專夜怒
風兼落葉戰霜枯
長懷秋塞人南北
獨對殘燈夢有無
二十年前一椽屋
傾談便已薄江湖

和韻答丁紛秋雨中見懷

早起見雲出須臾
雲滿山天公作秋
雨鞭龍不使閒初
濕一尺地頃刻千
里還飛鳥靜依巢
好友誰能攀瞻望
似河漢不得同歡
顏落葉任水湧破
卷隨風翻幸非杜
屋茅不漏獲居安
頗免飄搖苦還念
衣裳單感君心獨
古愁我處無歡我
早狂於酒登樓散
華顛雨亦不肯歇
薄暮天逾寒沉沉
至夜半吟我懷人
篇

題江片石萍香書屋幀子

伊人寄秋水悠悠
結遐想夢寐曠同
心尺書三復往神
已從之遊歷歷摹
形像癯然骨有仙
一室恣俯仰長松
起空籟流水答遙
響月出命清尊鶴
放搖歸槳機事不
到處天地爲寬廣
吟嘯足名山傲睨
千載上我亦與低
昂不搔心自痒昨
者叩門來果獲意
所做遂忘接待疎

相見笑撫掌各寫平生心是一還非兩示我萍香圖
我所真賞誰云片石孤中流無震盪此中中人對之
心目爽

和韻答范完初見寄

舊識陳驚座

謂陳理堂

詩壇細數才幾番雲影散昨夜海濱

來

理堂曾秉鐸通州

秋水方懷美予情正托媒何當天外雁先

把尺書裁

留別石渚諸友

天涯不放酒杯空臨別方知聚興融千里吳江千里越

菜香書屋詩草卷五

三

挂將離思片帆中

萍蹤幾處奈情何況是知交若個多三月三春容易到

烏啼霜落想山阿

明春復館此

兩載離家萬里歸歸時舊髻帶霜飛懸知貧賤荆妻好

猶爲征人肯下機

從下第始歸

垂老能禁幾別離縱非久濶也相思大家商個爲歡法

見了名花便賦詩

題丁綉秋紅豆山房詩草

古有玉川生破屋數間耳亦有林和靖梅鶴爲妻子君

身乃兼之此心淡流水一編不絕吟寄傲蕭齋裏哀歌
激怒濤長嘯驚山鬼想其下筆時雲煙盪滿紙蒼茫中
有象愜心斯可矣善怨與工愁物各因遇起懷抱不必
同令我讀之喜努力事前途字內有知己

題熊謹軒聽止圖

宇宙此生浮何處止吾止君言不自知聽之而已矣悠
悠水上槎海濶天空裏

題周少恬史陵草堂圖

仙不在塵外仙境皆人寰愚者處其囂幽寂誰爲傳史
陵路不遠中有桑麻田古木綠覆地澄波清涵天小橋
隱蘆荻遙山矗雲煙結廬謝人事可讀可耕焉周子述
先志逝將謀此遷在子旣克肖在人亦能賢不與俗相
雜何地非桃源竭來見圖書曠遠中蒼然他年訪子來
傍村添野船

江陰學使署呈座主錢黼堂夫子二首錄一

圖書萬卷擁專城玉軸瑤函鑒別精小子追陪忘草野
大臣風味是儒生青燈細共論文樂尊酒重添感遇情
從此征途寒色減東風日日繞車行

山中枯坐隨所聞見觸意卽書語無倫次

海氣昏朝暮十日天無晴長風不吹雨萬壑號秋聲五
月氣猶寒未減衣棉輕鹽河褰裳涉舟楫無由行貧愁
歲早歉富喜穀價騰富者亦勿喜天道原惡盈

山中靜無譁百鳥鳴不止爾音一何和爾情一何喜天
機自鼓盪與人無競耳而我安守元無端來謗毀悠悠
自古然此心如止水浩歌以自娛行將樂田里

吾黨多英姿一士于前常時不冠帶得酒歡陶然傷
哉貧旣甚乃肯我周旋對之數晨夕妙處或忘言豈惟

愜幽趣亦足披膽肝乃知真豪士不在縱橫間

園中有斷碑摩挲看字跡乃知前朝官勦倭留遺石州
乘旣缺書鹽志名莫識如何赫赫功不使昭載籍二百
餘年間荒煙與瓦礫感我弔古心豈徒斯人惜

滄海水清淺何論江與湖夙昔羨漁翁今見舉家吁大
魚不復遊小魚埋汙塗澤水未盈尺有網奚從鋪我爲
語魚翁且自待斯須老天鞭龍起雨灑菰蒲麤夜半風
浪生明日爾何如

孤館雙銀杏扶疎交枝柯其陰蔭一畝鬱鬱紛婆娑不

知暑已盛但覺氣候和有酒招客醉無酒自吟哦吟哦
日未夕皓月東升多

顏回在陋巷簞瓢不改樂雖然屢空賢終有田負郭吾
徒二三子筆硯爲畊穫雨露不自天豐歉爲人托就中
有老翁皓然髣髴鶴晴天一褐衣雨中雙赤腳天壤幾
豪華儒中不可着

吾衰鮮嗜好所親唯藥物爐火日常溫僮僕候煎沸彌
月守醫戒以飲能騰熱中心自焦熬何者關酒渴嗒然
若枯槁毋寧任放達舍閒無樂方惟醉可仙佛旦晚命
開罇頓使精神發

百感糾魂夢歷歷懷所親悲歡雜驚愕終夕徒紛紜道
遠書不達力屈志莫伸不如招良友歌咏時陳罇雖非
曠士懷少藉抒憂繁古人有達旨爲樂當及辰今人不
逮古斯意猶能因

